

BALUKANU SAMBANU

YA NKWIZULU YA GABRIEL NA DANIEL

 Kasi mu me yituka mingi na kumona . . . bantwenia ya beto na suka yayi, bana ya fioti, beno zaba, mwa ba “fefe” na ba “fifi,” bana, . . . beno zaba, ya bamvula kumi na sambanu. Mpe ba ke kwisaka na yinzo-Nzambi, beno zaba, pene . . . Bana-bakento ya bantwenia, na mvula yina, ba ke zolaka kuvwanda kitoko, beno zaba. Na ba, beno zaba, bansuki ya kuyoka, na zulu ya yintu ya bawu; mu monaka bawu, na mutindu mu vwandaka landila na kulonga, ya vwandaka kukulumuka, kukulumuka. Mpe, na manima ya mwa ntangu fioti, ya lombaka ti bawu kufula mupepe samu na kukatula yawu na kizizi ya bawu, ba-frisette nionso kusungamaka.

² Mwana-kento ya Mpangi-kento Downing, mpe—mpe mu monaka yandi. Mpe mwana—mwana—mwana . . . mwana ya Mpangi Collins . . . Nkumbu ya yandi kele nani? Mwana . . . [Muntu mosi me tuba, “Betty.”—Mu.] Betty, Betty ya fioti. Mu salaka mutindu ya kuseka, munu mosi. Kasi mu monaka bawu nionso kitoko, beno zaba, bawu nionso ya kuyidika mbote-mbote, na manima ya mwa ntangu fioti ya vwandaka . . .

³ Mbote, bantima ya beno kusakumuka, ba-cherie, beno ke kitoko, samu na munu, na mutindu nionso. Ya kieleka. *Kitoko*, kele—kele kuvwanda na mpeve ya kitoko ya kukwisa kuvwanda na balukutakanu ya mutindu yayi, mpe kuwa Nsangu ya mbote. Yawu yina ke salaka kitoko ya mwana-kento. Mpe mu banza ti mwana-bakala nionso ya kieleka yina ke zola kukwela, ya ke banza mutindu mosi. [Mpangi Neville me tuba, “Amen.”—Mu.] Matondo na nge, tata. Ya ke mbote. Muntu mosi me wisana na munu. Ti, ya kieleka. Mbote mingi. Mu ke kwikila ti ya ke Kieleka.

⁴ Ntangu yayi yina ke yitukisa ve? Mu me kubwa mbala mosi na Daniel 9 ntangu mu me zibula Biblia ya munu. Ntangu yayi, na bambala mingi mu ke tubaka na bantu nionso, beno katula kazaka ya beno ve, kana simisi ya beno ke ya kutobuka, na yawu mu banza ti ya munu ke ya kutobuka ve. Kasi—kasi ya kumaka na ntangu mosi mu lendaka katula yawu ve, samu simisi vwandaka ya kutobuka, ya kieleka kaka. Mpe mu banza ti yayi ke ya kutobuka ve.

⁵ Ntangu yayi, oh, samu na munu mosi, beto . . . mu ke kwikila

ti nkonga ya bantu yayi ke banza mutindu mosi, beto ke sepela na Mvwandulu ya Mpeve-Santu na suka yayi.

Mpe beto ke sepela na kimpangi mpe mvwandulu ya konso muntu. “Ya ke lembami, ya ke mbote, ya ke kitoko, samu na bampangi na kuzinga kintwadi. Ya ke mutindu mafuta ya ntalu ya kupakulama yina ke kulumuka na mandefu ya Aaron, tii na nsongi ya mvwela ya yandi.”

⁶ Mu kwendaka kuna samu na kudia bubu yayi, kuna na Blue Boar, mpe nani mu kutaka kuna muntu yankaka ve kasi Mpangi Bill awa, na Mpangi-kento Dauch yina kele ya kuvwanda kuna, ba vwandaka kudia kaka—kaka mwa nsusu mosi ya ntomo mingi, ya kukalanga yina mu monaka ntete ve, mpe ba vwandaka kulutisa ntangu mosi ya mbote, ba vwandaka kudia na kiese, beno zaba. Mu mataka kuna na zulu mpe mu kutanaka na kitini ya nene ya dibuundu kuna na zulu, mpe ba zolaka kufuta mpe madia ya munu ya midi. Ntangu yayi, ya vwandaka kieleka mbote mingi, mu me sepela na yawu.

⁷ Ntangu mu kumaka na yinzo, Billy kwisaka na caisse mosi ya ba-tomate yina muntu mosi natilaka munu, ntama kuna, na kizunga yina ya madidi kuna na Georgie, kisika yina ya ke vwandaka madidi, mutindu ba ke tubaka na munu, na bantangu yayi.

⁸ Na manima, mu kutanaka na ntwenia mosi ya bakala kuna na nganda. Mu katukaka na masolo ya munu, na manima ya midi yayi, mpe mu lutaka awa na yinzo-Nzambi pene ya ngunga mosi na ndambu me luta, mpe mwana yayi... ya vwandaka ya ntwenia yayi ya bakala, na nganda, yandi tubaka... Mu tubaka, “Mwini kele ngolo.”

Yandi tubaka, “*Ya kieleka!*” Mu zabaka ti yandi me katuka na Georgie, na yawu yandi tubaka, “*Ya kieleka mwini ke vwandaka ngolo na Georgie!*”

⁹ Mbote, beto ke meka na kutina kisika ya kulutila mwini diaka, mutindu yina ve? Ya ke samu na yawu beto kele awa.

¹⁰ Matondo mingi, bankundi ya munu, samu na mambote ya beno nionso. Yinki mu lendaka sala kukondwa beno? Ya kieleka yinki—yinki mu lendaka sala kukondwa beno? Kana mu vwandaka na muntu mosi ve yina zolaka munu, muntu mosi ve yina lendaka kuwa Nsangu, Nsangu ya munu nionso zolaka vwanda na mfunu ve. Mu lendaka kulonga Yawu ve na makunzi ya allo-allo mpe bayinti. Ba lendaka bakula yawu ve. Na yawu ya lombaka bantu mutindu beno, samu na kukwisa kuwa yawu. Mpe ntangu beno ke kwisa mpe ke vwanda na kisika ya mwini ya ngolo mutindu yayi, mpe ya ke... Kento ya munu tubaka ti yandi vwandaka kuzika kaka kuna na manima, na suka yayi. Mpe kumona beno bantu, mpe bantangu yankaka bambevo, kuvwanda na balukutakanu ya mutindu yayi, Nzambi kupesa beno yinzo mosi ya kitoko, kuna na Nkembo, ya ke kisambu ya

munu. Mpe mu banza mpe mu ke tula kaka kivuvu ti Yandi ke sala yawu.

¹¹ Ntangu yayi, beto tala. Kazaka ya munu, muntu mosi me tula yawu awa. Mpe mu fwana sala lutangu mosi na nkokila yayi. Bantu yikwa me sepela na kitini ya ntete ya yayi? [Dibuundu me tuba, "Amen."—Mu.] Oh, kana mwini vwandaka ngolo ve, beto zolaka landila kaka, beto zolaka sala sabala ya muvimba, na Buku ya Apocalypse. Mu ke zolaka Yawu kaka. Mu ke lutisakaka ntangu ya munu nionso na kati ya Yawu. Mpe beno sambila, kaka, samu na munu, na sabala yayi, samu na Lumingu ke kwisa mu . . . Kana Mfumu kuzola, mu fwana kuma kuna, samu na kutula basabala yayi na kisika ya yawu. Mpe mu me zaba kima mosi ve samu na yawu. Mpe na yawu mu ke tula kivuvu na Mfumu ti Yandi ke pesa munu mvutu.

¹² Mpe mu—mu me tanga yina—yina bantu mingi tubaka samu na yawu, yina sonikaka na yawu. Mu me tanga banoti awa, ya Docteur Scofield, nsoniki mosi ya nene, kasi mu lendaka wisana na yandi ve, samu na banoti mingi ya yandi, samu mu lenda mona yawu ve. Kisika . . . Ya fwana—ya fwana pesa kifwani ya kieleka.

¹³ Ntangu yayi, kana beno vwandaka vukisa kintwadi bitimi ya puzzle, mpe kima ya ntete beno zaba, beno tuba, "Oh, yayi kukwenda *awa*. Ve, ya kieleka yayi kukwenda *awa*." Mbote, beno fwana tala awa na kifwani ya beno, samu na kutala yina beno ke na kusala. Na manima kana beno—kana beno sala mutindu yina ve, beno ke sala poto-poto.

¹⁴ Ntangu yayi kana beno vwandaka baka . . . beno vwandaka na kifwani mosi ya nene, ya nseke ya kitoko, na ngombe mosi ya kento na zulu ya yinti ke na kudia matiti? Ntangu yayi, yina ke vwanda mbote ve (mutindu yina?), samu yandi ke kudiaka matiti na zulu ya yinti ve. Na yawu, ya ke mutindu yina kana, beno, kana Mpeve-Santu me tula ve Masonuku yina na kisika. Na yina, ya ke kisika yina, beno ke na kifwani ya nene ya mpulusu ya muvimbala. Ya ke samu na yina beto zola, Kieleka. Mpe tii kuna beto ke zaba Kieleka, kana ve beto tula yawu na lweka. Na yina, ntangu Nzambi me pesa beto Kieleka, mbote, na yina mu ke tuba yawu.

¹⁵ Beno zaba yinki? Mu banza ti Mpangi Roy Slaughter na—na bantu yankaka ya ntama awa, bayina vwandaka kwisa awa kubanda ntama . . . Ya vwandaka pene, mu banza, bamvula tatu to yiya ya ntete ya ministere ya munu, awa na tabernacle, mu lendaka longa ve na zulu ya difelo, samu mu—mu vwandaka bakula ve kana ya vwandaka kisika ya tiya, to kana ya vwandaka ntoni. Mpe na ntangu nionso Ndinga vwandaka tubila, *ntoni*, mu bakaka mbangululu, ya tubaka, "*Hades*." *Hades* kele "*ntoni*." Na ntangu nionso Yawu vwandaka tubila difelo, "*Hades*, *ntoni*." Mpe mu tulaka yawu kaka na lweka tii kuna mu kuzwaka yina ya vwandaka tubila, na yina mu longaka na zulu ya difelo; na

yawu ntangu mu zabaka yina ya vwandaka tubila, kifwana ya muvimba, mpe mu monaka yina ya vwandaka. Samu, mu banza ti longi ke na kiyeka na ntwala ya Nzambi, samu na yina yandi ke tuba na dibuundu, samu ba ke kangama na yawu. Mpe na yawu, na yina, yinki ke salama kana mu me kangamisa bawu ve na kisika ya yimbi, na manima ya ntangu mosi dikunzi yango kusimba mbote-mbote ve? Beno me mona?

Mpe na vision yina Mfumu pesaka munu, na mwa ntangu me luta, ntangu ba-million yina... ntangu Mosi yina vwandaka tuba na munu, tubaka, "Ba ke sambisa nge, ntete, na nzila ya Nsangu ya mbote yina nge longaka."

¹⁶ Mu tubaka, "Mu longaka mutindu mosi na Paul, mpe bayankaka."

¹⁷ Mpe ba-million yina nionso ya bandinga kubokaka, "Beto ke na kupema na zulu ya yawu." Yina sukisaka diambu. Beno me mona? Ya kieleka.

¹⁸ Na yawu mu zola landila na nkokila yayi, ntangu yayi, na yawu beto ke baka ntangu ya yinda ve. Mpe beno zimbana ve ntangu yayi... Ntangu yayi, na suka yayi... Mu ke na mwa banoti awa. Na suka yayi mu vwanda tubila Daniel na kimpika, Gabriel kwisaka na yandi samu na kutendula na yandi mambu yina ke salama na bilumbu ke kwisa. Yawu yina beto me mona na suka yayi, bandongosolo ya mambu ke salama na bilumbu ke kwisa.

¹⁹ Ntangu yayi, na nkokila yayi, beto ke tubila *Balukanu Sambanu Ya Nkwizulu ya Gabriel Na Daniel*. Lumingu ke kwisa, kana Mfumu kuzola, beto ke tula basabala makumi sambwadi, na kisika ya bawu, na kati ya ntangu. Mpe wapi kisika beto kele? Ntangu yayi, kana beto lenda mona yawu kaka mpe yawu kuvwanda ya kieleka, ya kusungama, na yina beto ke zaba ntangu yina beto ke na kuzinga. Ntangu yayi, beto ke zaba ve ntangu Yandi ke kwisa; muntu mosi ve ke zaba yawu. Yesu kuzaba yawu ve, Yandi mosi. Yandi tubaka ti Yandi me zaba yawu ve. Yandi tubaka ti Tata, kaka, me zaba yawu. Ata mpe Bawanzio me zaba yawu ve. Mosi ve na kati ya beto me zaba ntangu Yandi ke kwisa, kasi beto lenda tuba ngunga yina... ntangu yina beto ke na kuzinga, na kuzabaka ti beto me kuma pene-pene.

²⁰ Ntangu yayi, samu na kusala fioti ngwisani na yina beto me mona, samu bantwenia ya babakala ke na kubaka yayi na ba-bande... Ba-masini ke na kusalaka kuna na kati ya kivinga. Mpe ba-bande, ya kieleka, ba ke tinda yawu, bisika nionso.

²¹ Ntangu yayi, na dilongi ya suka yayi, na manima ya beto me vutukila ba-kapu 4 na 5, na yina beto me baka... me banda na kapu 9 ya Daniel. Mpe ntangu yayi, na nkokila yayi, beto ke landila kapu 9. Na ntwala beto simba yawu, beto kulumusa

bayintu ya beto na mwa ntangu fioti samu na kutuba na Nsoniki ya Ndinga.

²² Nzambi ya beto ya kufuluka na lemvo, beto me ndima ya kieleka ti Nge zaba kieleka dibanza ya ntima ya beto. Nge zaba samu na yinki beto kele awa. Mpe Nge zaba ti beto me kwisa ata fioti ve na nkokila yayi samu kaka ti beto me banza ti ya lendaka vwanda kisika ya kitoko ya kukwisa, samu na mwa kupema na manima ya midi. Tata, mu ke kwikila ve ti ya ke na muntu mosi awa yina ke na lukanu yina. Mu ke kwikila ti beto kele awa na nkokila yayi samu beto kele kieleka ya kuvedila, ya kusungama, mpe beto zola zaba MUTINDU ME TUBA MFUMU.

²³ Beto zola Nge, Mfumu, mpe beto zola Ndinga ya Nge. Mpe kana kisika yayi Nge pesaka beto, mwa muludi kaka na zulu ya bayintu ya beto, mpe ba-boloko yayi ya matadi, beto ke tonda Nge samu na kisika yayi. Na yina, beto ke kwikila ti ya ke na Yinzo mosi kuna na matuti, kisika beto ke na kukwenda. Mpe beto ke banza na bankooko ya beto yina kuzwaka ve ntangu yayi ya mbote, mpe ya ke sala ti beto kukulumusa bantima ya beto na nsoni, Mfumu, ata mpe samu na dibanza ya kubokuta.

²⁴ Ntangu yayi, Tata, beto ke sambila ti Nge ke zibudila beto, Masonuku, na nkokila yayi. Kwisa, tambula, na lweka ya mosi na mosi ya beto, mutindu beto ke landila na kukwenda na nzila yayi na nkokila yayi. Tuba na beto mutindu Nge salaka na bayina katukaka na Jérusalem, yina vwandaka kwenda na Emmaüs. Na yina, ntangu lukutakanu ke kuma na nsuka, na nkokila yayi, beto fwana kwenda konso muntu na yinzo ya yandi mpe kutuba, “Bantima ya beto vwandaka kupela ve ntangu Yandi vwandaka kutuba na beto na nzila ya Ndinga ya Yandi!”

²⁵ Sakumuna lutangu yayi. Sakumuna mwa bingolo-ngolo ya munu, Mfumu. Zibula yinwa ya munu na yina kele ya kieleka, mpe kanga yawu na yina kele ya kieleka ve. Mpe nkembo kuvutuka na Nge, mpe nkembo na kati ya bantu ya Nge, ti ba fwana mona ngunga yina beto ke na kuzinga mpe Nkwizulu ya Mfumu Yesu me belema. Na yina, beto ke lomba yawu na Nkumbu ya Yandi—ya Yandi, Nkumbu ya Yesu Klisto. Amen.

²⁶ Ntangu yayi, samu na kuvutuka na manima na Masonuku yina beto me baka na mwa ntangu fioti, beto me mona ti Daniel vwandaka na kimpika bamvula makumi sambanu na nana. Beno banza yawu! Ntangu yayi, beno, yina ke na ba-papié na kilapi, yina sonikaka yawu ve na suka yayi, beno lenda sonika yawu na nkokila yayi. Kubanda mvula 606 na ntwala ya Yesu Klisto tii na mvula 538. Beno katula 538 na 606, ya ke pesa beno bamvula makumi sambanu na nana yina Daniel vwandaka na... kimpika; ata dibuundi ya kukwenda ve, malongi ya kuwa ve, kima mosi ve. Kasi yandi vwandaka na mwa babuku, mwa ba-rouleau, yina profete mosi na ntwala ya yandi pesaka profesi, mpe ya vwandaka—ya vwandaka Jérémie.

²⁷ Ntangu yayi, na ntangu ya vwandaka longuka Masonuku, yandi monaka ti ntangu vwandaka me luta, ntangu ya bamvula makumi sambwadi... Mpe Daniel vwandaka kwikila kieleka konso ndinga yina profete Jérémie tubaka. Mpe mu ke tuba yayi, na kalasi ya munu na nkokila yayi: Beto fwana kwikila baprofete ya beto? [Dibuundu me tuba, "Amen."—Mu.] Yinga, tata. Samu, Ndinga ya Mfumu kwisaka na baprofete. Ba ke na MUTINDU ME TUBA MFUMU. Mpe profete ya kieleka ke swaswana ata fioti ve na ndinga ya profete yankaka. Ba ke sala ata fioti ve ti Yawu kutuba kima yina Yawu me tuba ve. Ba ke tuba kaka yina profete ya kieleka kutubaka, yawu yina ke salaka bawu kuvwanda ba-profete. Na yina ntangu ba ke simba yawu, na yina ba ke zabisa yina ke kwisa, na kuzabaka yayi, ba ke na boma na kati ya ntima ya bawu, na boma ya kutuba kima ya luvunu yina ke zimbisa muntu mosi. Beto zola sala mutindu yina ata fioti ve. Beto zola vwanda kieleka ti beto ke na Ndinga ya Mfumu na ntwala beto kutuba MUTINDU ME TUBA MFUMU. Beno me mona? Ya fwana vwanda Nsangu mosi ya kieleka, yina me katuka mbala mosi na Kiti ya kimfumu ya Nzambi, to beto ke tuba yawu ata fioti ve.

²⁸ Ntangu yayi, na ntangu ya vwandaka longuka Masonuku, yandi monaka ti bamvula makumi sambwadi me luta. Na yawu, yandi vwandaka kuna bamvula makumi sambanu na nana, bamvula zole bikalaka diaka tii kuna Nzambi ke vutula bantu ya Yandi na yinsi ya bawu.

Ntangu ya vwandaka sambila, beto me mona ti ya vwandaka na Wanzio mosi ya ngolo yina katukaka na Zulu. Muntu mosi lenda bokila nkumbu ya Yandi? [Dibuundu me tuba, "Gabriel."—Mu.] Gabriel. Mpe Yandi ke Wanzio samu na dibuundu ya ba-Juif. Bantu yikwa kuzaba yawu? Bisika nionso, ya ke Gabriel. Gabriel ke munati nsangu na dibuundu, dibuundu ya ba-Juif; kwisaka na Marie; Yandi kwisaka na Zacharie. Ya ke vwandaka Gabriel, ntangu nionso. Mpe Yandi kele mosi ya Bawanzio ya nene ya Zulu. Mpe Yandi natilaka Mpangi ya beto Daniel mbote ya kitoko yina katukaka na Nzambi! "Oh, Daniel, nkundi ya luzolo!"

²⁹ Ya lendaka sala beno mbote ve, na kubanza ti Nzambi me zolaka beno? Kana mu vwandaka nkundi ya luzolo ve, mu ke zola zaba ti ba me zola munu kuna na Zulu, beno ve? Ya kieleka. Kuvwanda fioti kaka... Yandi ke banzaka na munu, konso ntangu, ya ke sala kaka ti mu kuboka, samu na kubanza ti beto ke na mfunu samu na Yandi. Mpe beto ke na kivuvu ti beto ke na mfunu samu na Yandi, samu, "Na ntangu beto vwandaka bansumuki, Klisto kufwaka na kisika ya beto," mpangi. Mpe, ntangu yayi, beto yina vwandaka banzenza samu na Nzambi, ntangu yayi Yandi me nata beto pene-pene ya Nzambi mpe me pesa beto lufutu ya mpulusu ya beto, ya zola tuba, Mpeve-Santu. Mpe na kati beto ke na lukwikilu mosi ke zangula beto na zulu

ya bima ya yinza, mpe beto ke luta mbala mosi na zulu ya yawu. Ya ke nkembo. Mutindu yina ve? Mbote mingi.

³⁰ Na ntangu yandi vwandaka sambila, Gabriel kwisaka mpe tubaka na yandi kaka ve ti bamvula zole bikalaka na ntwala bawu vutuka na yinsi ya bawu, kasi Yandi tubaka na yandi nzietolo ya muvimba ya yinsi yayi. Beno banza na yawu! Nzietolo ya muvimba, nzietolo nionso ya ntoto, Gabriel tendulaka yawu na Daniel. Yandi tubaka ti ba fidisaka Yandi samu na kutuba na Daniel kima yayi ya nene. Beno banza wapi mutindu profete yina ya nene kuwaka! Mpe Yandi tubaka na yandi ti ya vwandaka na basabala makumi sambwadi yina ba zengaka samu na bantu ya yandi, tii na kubebe; yina kele nsuka, na yawu nionso me mana, ya me kuma na nsuka. Yandi tubaka, "Ya ke na basabala makumi sambwadi."

³¹ Bayankaka ke kwikilaka ti ya ke bangonda, bayankaka bilumbu, bayankaka... Huh! Kana ya ke kaka basabala, ya ke kaka na bamvula zole na bangonda tatu, to mvula mosi na bangonda tatu. Mpe, beno me mona, beno... Ya ke samu na yina beto fwana mona yina ya kele, kana beto zola vwanda na kieleka.

³² "Ba me zenga basabala makumi sambwadi samu na bantu ya nge." Samu na yinki lukanu? Samu na yinki? Bantu ya nani ba zengila ntangu? Bantu ya Daniel, ba-Juif. Mpe ba zengaka ntangu samu na yinki? Samu na Daniel kaka ve, kasi samu na mbanza ya santu ya Daniel; beno me mona; mbanza ya santu ya Daniel. Ntangu yayi, kalasi ya munu, yinki vwandaka mbanza ya santu ya Daniel? [Dibuundu me tuba, "Jérusalem."—Mu.] Jérusalem.

³³ Mpe ntangu yayi beto ke baka, ntangu yankaka beto ke baka yawu na nkokila yayi: Wapi kisika Jérusalem vwandaka? Nani bandaka Jérusalem? Beno me banzaka yawu ntete ve? Nani bandaka Jérusalem? Yinki ntangu ba bandaka yawu? Beto ke tubila yawu, na manima ya mwa ntangu fioti. Nani bandaka Jérusalem? Tala, ya ke kima mosi ya fioti ya kubumba kuna na nsongi, kasi ya kieleka Yandi me tubila yawu kuna. Yinga, tata. Nani bandaka Jérusalem, mpe yinki ntangu ba bandaka yawu? Mbote mingi. Mpe ya ke mbanza ya santu ya Daniel.

³⁴ Mpe beto ke bakula ti mbanza yina, yina me ba me singaka ya me lunga ntangu yayi bamvula mafundra zole, ba ke tunga yawu diaka mpe ba ke vutula yawu diaka. Mpe bisambu ke vutuka diaka na tempelo mutindu ya vwandaka na mbandukulu. Ya kieleka. Jérusalem ke vwanda kuna, ntangu yayi, mpe ya ke vwanda na munkayulu, ba ke pesa diaka dikabu ya konso kilumbu kaka mutindu ya vwandaka na mbandukulu. Beto ke tubila mambu yina nionso, mu banza, na nkokila yayi, to ya mingi kati na yawu.

³⁵ Ntangu yayi mu zola beno zaba, bankundi ya munu, ti, kusimba bima yayi, ya kieleka mu ke tula na lweka basabala

ya malongi. Kasi mu ke tubila yawu kaka na zulu-zulu, na mutindu ti ntangu mwini ke vwanda ngolo ve, to mwa fioti na ntwala, ntangu beto ke tubila Bidimbu Sambwadi yayi, Bambungu Sambwadi, Bampungi Sambwadi, bima yayi nionso, ti mu ke bambuka moyo na kutubaka, “Beno ke bambuka moyo na basabala makumi sambwadi ya Daniel? Beno ke bambuka moyo na nsungi ya Dibuundu, ntangu ya mataka, mpe yina salamaka?” Mpe basabala makumi sambwadi yayi ya Daniel ke baka kubanda kukwenda ya Dibuundu tii na kuvutuka ya Dibuundu. Ya ke baka kitini yayi. Ntangu yayi, ntangu yayi, basabala makumi sambwadi ya Daniel nionso ve; kitini ya yawu. “Ba me zenga basabala makumi sambwadi.”

³⁶ Ntangu yayi, ya vwandaka na balukanu sambanu na nkzwizulu ya Yandi, samu na kutuba na yandi yina ke salama. Ntangu yayi, ya vwandaka na balukanu sambanu ya nkzwizulu ya Yandi. Ntangu yayi, na nkokila yayi, mu banza ti beto ke vutukila Masonuku yina beto me mona na suka yayi, na ntangu beto monaka ti ya vwandaka na balukanu sambanu. Beto me kuma kisika yango. Ntangu yayi beto me mona ti ya vwandaka na balukanu sambanu, mosi ya yawu. Ntangu yayi beto baka . . . kapu -yiya, nzila -yiya . . . nzila ya 24 ya kapu 9 ya Daniel.

Mpe ba me zenga basabala makumi sambwadi samu na bantu ya nge . . .

Ntangu yayi beno bambuka moyo, yina ke nzietolo ya muvimba ya ba-Israelite ke sala na ntoto yayi. Ba me zengila bawu ntangu. Basabala makumi sambwadi ba me zengila bawu. Yawu yina ba me zenga samu na ba-Juif.

. . . samu na bantu ya nge mpe samu na mbanza ya nge ya santu, . . .

Na yina, basabala makumi sambwadi yayi, ntangu yayi beno kondwa yawu ve, ya ke talisama pwelele na ntangu yina tii na nsuka ya ba-Juif, mpe diaka tii na nsuka ya Jérusalem, tii kuna ba ke tunga mbanza ya malu-malu. Ntangu yayi, oh, mu banza ti beto ke tubila yawu, na mutindu ya mbote mpe na mudindu na nkokila yayi.

. . . ba me zenga samu na bantu ya nge mpe samu na mbanza ya nge ya santu, . . . (Samu na kusala yinki?) . . . samu na kusukisa kukolama, . . .

³⁷ Yinki Yandi tubaka na yandi ntangu yayi? Yandi vwandaka meka na kuzaba bantangu yikwa ya ke vwanda. “Mu zaba ti beto me kuma na ntangu ya nsuka.” Mutindu beto kele na ntangu yayi, “Mfumu . . .”

³⁸ Bantu yikwa na kalasi yayi, na nkokila yayi, ke kwikila ti beto me kuma na ntangu ya nsuka? Beno tuba, “Amen.” [Dibuundu me tuba, “Amen.”—Mu.] Matondo na beno. Beto me kuma na nsuka. Ntangu yayi beto ke na kumeka na kumona, na lusalusu ya Nzambi, bantangu yikwa me bikala. Yinki ntangu

beto ke na kuzinga? Ya ke samu na yawu beto ke vutuka yina tubaka ba-profete, mpe nionso yina, mpe samu na kumeka kuzaba kisika beto kele.

³⁹ Mpe yawu yina Daniel salaka. Yandi balulaka kizizi ya yandi na Nzambi. Bantu yikwa me tanga Daniel 9 bubu yayi? Beno telemisa maboko ya beno. Mbote mingi. Beno me mona kisambu ya yandi, wapi mutindu yandi fungulaka samu na bantu ya yandi, mpe yandi fungulaka samu na yandi mosi. Yandi zolaka kundima ya kieleka na kumona ntangu ba ke vutuka, samu yandi zolaka kukubika bantu na kuvutuka.

Ntangu yayi, yina mu ke na kumeka kusala, kele kuzaba ntangu beto ke mata, mpe kukubika bantu na kumata, bayina ke vwanda ya kukubama. Mpe beto me balula kizizi ya beto na Nzambi, na nzila ya bisambu mpe kubondila, samu na kuzaba, “Mfumu, yinki ngunga yayi beto ke na kuzinga?”

⁴⁰ Beto me mona bima yayi nionso ya mutindu na mutindu kusalama; beto ke mona yinza na kati ya mubulu. Beto ke mona ntangu me kuma pene-pene. Ba ma-... bisono na zulu ya kibaka, bima nionso yina Nzambi tubaka. Beto ke kuwa Ntwadisi ya yinsi ya beto ke zonzila mvita yankaka, ntama mingi ve. Beto ke kuwa mambu yina ba me zabisa na ntwala, “Na mwa, oh, na mwa bangunga fioti na manima ya mvita, ba me zabisa ti bayinsi ke vwanda kima yankaka ve kasi mbombi ya volcan.” Mpe beto me zaba ti ya ke mutindu yina.

Na yawu beto zaba, na ntwala yina kusalama, Dibuundu fwana kwenda. Na yawu, “Mfumu, wapi kisika beto kele?” Ya kele samu na yina mu ke kwikila ti Yandi ke zabisa beto. Beto me balula bizizi ya beto samu na kuzaba yawu. Ntangu yayi, ntete, beto baka yawu.

Ba me zenga basabala makumi sambwadi samu na bantu ya nge...mbanza ya nge ya santu, samu na kusukisa kukolama,...samu na kusukisa disumu, mpe samu na kusungika disumu ya nkú,...mpe samu na kunata kieleka ya mvula na mvula, ...samu na kutula kidimbu na vision mpe profesi, mpe samu na kupakula kisika ya kulutila Santu.

⁴¹ Yawu yina vwandaka balukanu sambanu ya nkwizulu ya Gabriel.

⁴² Beto banda ntangu yayi, numelo ya ntete. Kana beno zola kusonika yawu, beno yina ke na bilapi. Numelo ya ntete, “Samu na kusukisa kukolama,” yina ke kima ya ntete. Ntangu yayi, samu na kusukisa kukolama ya Israel, yina kukolamaka na Nzambi, ya ke vwanda kubalula kukondwa busantu ya Jacob.

Ntangu yayi, samu na kubakula yayi, beto baka na ba-Romains. Ba-Romains kapu 11, mpe beto banda na nzila ya 21 ya ba-Romains 11. Ntangu yayi beto ke sala yinki? “Samu kusukisa kukolama.” Ba-Romains 11:21. Mbote mingi.

Ya kieleka kana Nzambi zengaka divala ya yinti yina ba kunaka, . . . (Nani ya vwandaka? Israel.) . . . nge fwana kusala keba . . . samu ti yandi lenda kusala yawu mpe na sika ya nge.

Ntangu yayi, mu zola ti beno, ntangu beno ke vutuka na yinzo, beno kutanga kapu 11 ya muvimba. Mu ke tanga yayi kaka na mutindu ti . . . Beno sonika kapu ya muvimba, mpe beno tanga yawu.

. . . samu ti yandi lenda kusala yawu mpe na sika ya nge.

Na yina tala wapi mutindu Nzambi ke lakisaka bumbote . . . nganzi: yandi ke lakisaka nganzi ya yandi na sika ya bayina me kubwaka, . . . kasi na ntvala ya nge yandi ke lakisaka bumbote ya yandi, kana nge kutatamana na kutula kivuvu na bumbote ya yandi: kana ve nge . . . ba ke zenga nge mutindu divala.

Mpe kana ba-Juif kwi- . . . kana ba-Juif kwikila ve, Nzambi ke vutula bawu, na bisika yina bawu vwandaka ntete: samu yandi kele na ngolo ya kunamika bawu diaka na bisika yina.

Beno me mona, ya me tuba ti ya ke vwanda na ntangu yina ba ke katula Bantu ya makanda, mpe Israel ke vutuka diaka.

Ya kieleka nge kele divala ya yinti yina ya—ya mfinda ba me zenga nge mpe ba me namika nge na yinti ya olive yina ba kunaka (Bantu ya makanda), mpe yina ke ya kuswaswana na yinti yina ba katulaka nge . . .

Beto vwandaka ya kuswaswana na yinti yina ba kunaka, banzenza, ya kukondwa mawa, ya kukondwa Nzambi, ata kivuvu mosi ve. Mpe Nzambi, na mawa ya Yandi, samu na kupesa beto siansi, samu na kukolama Yandi katulaka Israel yina vwandaka mbote, mpe tulaka bawu na lweka, yinti ya olive ya mfi- . . . yinti ya olive yina ba kunaka, mpe me kotisa yinti ya olive ya mfinda, ya kuswasana na nkadulu ya Yandi.

. . . samu na yina me tadila ba-Juif bawu kele mavala ya yinti ya olive yina ba kunaka: na yina ya kele mpasi ve ti ba namika bawu diaka na yinti yina bawu vwandaka ntete.

Mbote mingi, beto landila na kutanga.

Bampangi, mu zola kuzabisa beno, mabanza ya mansweki ya Nzambi, samu ti beno tuba ve ti beno kele bantu ya ndwenga; Ndambu yankaka ya bantu ya Israel ke lenda ve na kubakula tii ntangu lutangu ya Bantu ya makanda . . . kuzwa mpulusu.

⁴³ Tii ntangu Nzambi ke manisa na Bantu ya makanda, Israel vwandaka meso ya kufwa. Kana bawu kubwaka na masumu mpe kukolama na Nzambi, samu Nzambi kufwaka meso ya bawu,

samu ba namika beto. Beno me bakula yawu? nzila ya 26 ntangu yayi:

Mpe mutindu yina Israel nionso ke kuzwa mpulusu:...

⁴⁴ Nzambi kufwaka meso ya bawu na luzolo samu na beno na munu. Bawu lenda mona ve, samu Nzambi me kufwa bawu meso. Mpe Israel nionso, Israel ya kieleka, ke kuzwa mpulusu. Yinki Wanzio tubaka? Nkembo! “Samu na kusukisa kukolama ya Israel! Mu me kwisa kutuba na nge ti ya ke vwanda na ntangu mosi wapi kukolama ya Israel ke suka.” Nzambi ke zenga divala yina ya mfinda, mpe ke namika yawu, kuna, na divala yina ya kieleka diaka.

⁴⁵ Oh, bantangu yankaka ya ke sala ti ntima ya munu kukangama, na kumona bamputu, bantu yayi ya mawa kuna ba me katula, yina me zaba ve kisika ba ke kwenda; mpe kubanza ti Nzambi, na lemvo ya Yandi, salaka yawu samu mu kuzwa mpulusu. Yandi kufwaka meso ya bawu samu na Mesiya ya bawu mosi, kangaka makutu ya bawu samu ti bawu kuwa Yandi ve; kasi, ba vwandaka mona bimangu ya Yandi, mpe bawu vwandaka mona bimangu ya Yandi mpe bima yina Yandi vwandaka sala.

⁴⁶ Matthieu, mu banza, kapu 12, to kapu 8 to 12, me tuba, “Ata ti Yesu salaka bimangu mingi, ba lendaka kwikila ve.” Samu, Nzambi tubaka, “Ba ke na meso kasi bawu lenda kumona ve, mpe ba ke na makutu kasi bawu lenda kuwa ve; samu ti bawu kumona na meso ya bawu mpe bawu kuwa na makutu ya bawu, samu ti mpe Mu ke balula bantima ya bawu.” Kasi, samu na kupesa beto siansi, Yandi fikaka meso ya bana ya Yandi Mosi, me katula bana ya Yandi Mosi na mesa, mpe me yambula bawu na kubeba ya Mpeve, samu Yandi kuzwa... samu beto vwanda na siansi ya kuzinga, samu na kupesa beto Luzingu. Nzila ya 26, diaka.

Samu ti Israel nionso kuzwa mpulusu: mutindu ya me sonama na buku, Kivuukisi ke katuka na mbanza Sion, mpe yandi ke katula mambu nionso ya yimbi ya bana ya Jacob:

⁴⁷ Yinga, Yandi ke kwisa na Mongo ya Sion, mosi ya bilumbu yayi. Na zulu ya Mongo Olive, ba ke zaba Yandi, mpe Israel nionso ke zaba ti ya ke Yandi. Bantu ya makanda ke kuma na nsuka. Divala yina ba namikaka, Nzambi ke baka na yawu mbuma yina ba me buka. Mpe divala yina ya mfinda ke vwanda...

⁴⁸ Mpe ntangu yayi beno bambuka moyo, na zulu mingi awa ntangu beno ke tanga, Yandi tubaka, “Kana nsimbulu yina vwandaka ya santu, mpe nsimbulu yina vwandaka Nsimbulu ya santu, mpe mbuma yina ke basika na Nsimbulu yina ya santu ke vwanda mbuma ya santu.” Mpe kana Nsimbulu yina vwandaka

Yesu Klisto, Yina kele Nsimbulu mpe Dikanda ya David; kana Luzingu yina vwandaka kati ya Yandi, mataka na nzila ya nsungi ya ba-Juif mpe ba katulaka bawu yawu, mpe meso ya bawu vwandaka ya kufwa samu ti beto kumona, baluzingu ya beto fwana fwanana na Divala yina ya lusakumunu. Oh, yinga, mpangi. Ya kieleka.

⁴⁹ Nzambi katulaka bawu, na luzolo, mpe kufwaka meso ya bawu samu ti beto kuzwa siansi ya kumona, ya me pesa beto ntangu mosi ya mbote. Mpe na yayi beto ke tambula mutindu ti beto kele muntu mosi. Paul me tuba na bawu awa, “Beno sala keba na yina beno ke sala. Beno sala keba! Samu kana Nzambi lundaka ve divala yina ba kunaka, wapi mutindu Yandi ke vwindwa na mawa samu na divala ya mfinda yina me . . .”

Na yawu beto ke baluka, beto ke tuba, “Mu ke Presbytérien! Mu ke Methodiste! Mu ke Baptiste! Mu ke Pentecotiste!” Yina zola tuba kima mosi ve na Nzambi. Beno fwana butuka mbala zole na Mpeve-Santu yina me katuka na Nsimbulu. Kasi Yandi me kwisa . . .

⁵⁰ Ntangu yayi, beno bambuka moyo, Yandi ke na kutubila Bantu ya makanda ve. Mu ke tubila yawu kaka na kulutaka samu na kutalisa na beno yina salaka ti Bantu ya makanda kuzwa siansi.

⁵¹ Kasi, Yandi kwisaka “samu na kusukisa kukolama,” kusukisa yawu. Ntangu yayi, kana beto vutuka diaka na Daniel, mpe beto ke mona na Daniel, beto ke mona awa, na nzila ya 24. Mbote mingi. “Samu na kusukisa kukolama.” Samu na kusukisa yinki? Samu na kusukisa kukolama ya Israel.

Yinki kele *kukolama*? Ya ke kukolama na kima mosi. Kukolama na munu, kele kusala munu yimbi. Kukolama na nge, kele kusala nge yimbi.

Na yawu, Israel salaka yimbi na Nzambi. Mpe na sabala yayi ya sambwadi, yina ke salama? Nzambi ke sukisa kukolama ya Israel. “Kusukisa kukolama,” ke vwindwa, “kubalula kukondwa busantu na Jacob.” Na yina Israel nionso ke butuka diaka. Bawu nionso ke kuzwa Mpeve-Santu.

Ntangu yayi, numelo ya zole, beno sonika yawu na papié ya beno.

⁵² Beto lendaka baka ntangu ya yinda na zulu ya yawu, kasi mu ke zola ve kulonga na zulu ya yawu. Mu zola kaka kutuba na beno, samu ti beno bakula yina yawu kele. Ntangu beto ke baka Bidimbu Sambwadi yayi, na yina beno ke landila kaka na kulonguka Dibuundu, Bidimbu, Bampasi, mpe beno ke zaba kisika beto me tealama. Mbote mingi.

⁵³ Numelo ya zole, “Samu na kusukisa masumu.” Ntangu yayi beto tanga diaka, Daniel.

...*samu na kusukisa...kukolama, mpe—mpe kusukisa masumu,...*

Yawu yayi lukanu ya zole ya nkzwizulu ya Yandi. Ya ntete, kele kusukisa kukolama ya Israel; mpe samu na kusukisa masumu. Wapi sika Israel salaka disumu? Wapi sika bawu salaka disumu ya bawu ya nene? Wapi sika bawu kabwanaka bawu mosi na Nzambi?

⁵⁴ Beno kuwa ntangu yayi na bukebi. Beto baka Santu Matthieu kapu 24. Mpe ya kele awa Israel salaka kifu ya bawu ya nene. Ya kele awa yandi salaka disumu ya yandi ya nsuka, mpe yawu yina ya ke mutindu yandi kele bubu yayi. Matthieu, kapu 27 ya Nsangu ya mbote ya Santu Matthieu, mpe nzila ya 25 ya kapu 27. Beto banda na nzila ya 21.

Mfumu ya kizunga yufulaka bawu diaka, Nani na kati ya bawu zole beno zola ti mu pesa kimpwanza? Mpe bawu tubaka, Barabbas.

Ntangu yayi beno bambuka moyo, yina ke Israel. “Barabbas!”

Pilate tubaka na bawu, Yinki mu ke sala...na Yesu yina ba ke bokilaka Klisto? (Beno kuwa bawu!) Bawu nionso tubaka na yandi, Koma yandi na kulunsi.

Beno bambuka moyo, yina kele Mesiya ya bawu yina Daniel tubaka ti ke kwisa. Beno bambuka moyo na suka yayi, na dilongi yayi awa, “Ba ke katula Yandi, samu na Yandi mosi ve,” ya kele samu na kima mosi Yandi salaka.

...*Koma yandi na kulunsi.*

Mpe Pilate tubaka, Wapi diambu ya yimbi yandi me sala? Kasi bawu bokaka diaka na ngolo nionso, na kutubaka, Koma yandi na kulunsi.

Ntangu Pilate monaka ti yandi lendaka sala diaka kima ve, mpe...muvisu vwandaka lutila, mpe yandi bakaka masa, mpe yandi sukulaka maboko ya yandi na ntawala ya bantu, yandi tubaka, lufwa ya muntu yayi kele na yintu ya munu ve: ya kele...diambu ya beno.

⁵⁵ Beno kuwa! Kifu ya bawu yawu yayi. Disumu ya bawu yawu yayi.

Bantu nionso vutulaka, mpe tubaka, Beto me ndima ti lufwa ya yandi kuvwanda na bayintu ya beto mpe bana ya beto.

56 Ya ke kisika yina ba salaka yawu. Yandi vwandaka sukisa disumu samu na bawu. Wapi mutindu Yandi lendaka sala kima yankaka na nganda ya kulemvokila bawu, na kuzabaka ti Yandi kufwaka meso ya bawu, samu beto lendaka kukota? Ya ke monana ti bana ya Yandi Mosi vwandaka lomba Menga ya Yandi. Mpe ba vwandaka meso ya kufwa, mpe Yandi zabaka ti ba

vwandaka meso ya kufwa. Ya kele samu na yawu Yandi dilaka samu na kulemvokila bawu. "Lemvokila bawu, Tata, samu bawu zaba ve yina ba ke na kusala." Ba ke meso ya kufwa. Ya ke samu na beto ba vwandaka meso ya kufwa. Na kukondwa lukwikilu ya bawu ba salaka yayi. Kasi ntangu ba ke mona Yandi diaka... Amen!

⁵⁷ "Samu na kusukisa disumu." Yinki kele disumu? Kukondwa lukwikilu. Ba kwikilaka ve ti ya vwandaka Mesiya. Ba lendaka mona ve ti Yandi vwandaka Mesiya, ata ti Yandi salaka bidimbu nionso Mesiya zolaka sala. Kasi bawu lendaka mona yawu ve. Ba vwandaka meso ya kufwa.

⁵⁸ Na yawu ntangu beno ke mona bantu ke tuba, "Mu ke kwikilaka ve na kubeluka ya Kinzambi. Mu lenda mona yawu ve. Mu lenda mona ve mbotika ya Mpeve-Santu." Beno dasukila bawu ve; ba ke meso ya kufwa. Ba ke tuba, "Mu lenda mona ve Nsangu yayi ya Nkwizulu ya Yandi. Mu lenda mona ve mbotika yayi ya Mpeve-Santu. Mu lenda mona ve nkuna ya nioka. Mu lenda mona ve bima yayi." Ba ke meso ya kufwa, mpe bawu zaba yawu ve. Beno sambila kaka samu na bawu. Mbote mingi.

⁵⁹ Na kukondwa lukwikilu ya bawu; kasi, ntangu ba ke mona Yandi, ntangu Yandi ke kwisa diaka, ya ke sukisa kukondwa lukwikilu ya bawu. Oh, la la! Beto baka ntete Genèse kapu 25, kapu 45, samu na kubaka kifwani ya yawu. Mu me sonika kima mosi awa, Genèse 45, beno yina ke na kusonikaka. Oh, wapi mutindu mu zola Nsangu ya mbote yayi ya ntama! Mbote mingi. Ntangu yayi beto zaba kisika beto kele.

Beno ke kuwa munu mbote-mbote, kuna na nsuka ya kivinga? Beno telemisa maboko ya beno kana beno ke kuwa munu. Kima yayi ke fioti pene-pene mingi.

⁶⁰ Ntangu yayi beto ke tanga kitini ya Masonuku yayi. Mu zola ti beno kuwa, beno yina ke na Biblia ve. Beno yina ke na Biblia ya beno, ya ke na Genèse. Ntete, beto banda na kapu 44, na nzila ya 27.

⁶¹ Ya ke Joseph, mpe Joseph kele kifwani ya kulunga ya Klisto. Beto me zaba yawu. Bantu yikwa me zaba yawu? Ba yinaka yandi na bampangi ya yandi. Samu na yinki? Samu yandi vwandaka ya kimpeve, yandi vwandaka mona ba-vision, yandi vwandaka tendula bandosi. Yandi vwandaka muntu ya kimpeve na kati ya bampangi ya yandi, mpe ba yinaka yandi. Kasi tata ya yandi zolaka yandi.

Mutindu yina ba yinaka Yesu na mabuundu ya badenomination, kasi Tata ya Yandi Nzambi zolaka Yandi. Samu na yinki ba yinaka Yandi? Samu Yandi vwandaka ya kimpeve. Samu...Ba tubaka, bawu tubaka Yandi vwandaka ngangkankisi, mpeve ya yimbi.

⁶² Beno ke bambuka moyo na yina bampangi ya Joseph tubaka na yandi? "Tala muntu ya bandosi ke na kwisa." Beno me mona?

Beno me mona, diambu ya mutindu mosi. Mpe ba tekisaka Joseph na ntalu mosi yina Judas tekisaka Yesu, bampata makumi tatu. Ba losaka yandi na dibulu, mpe ba kwendaka mpe tubaka na tata ya bawu ti kima mosi me kufwa yandi, yandi me kufwa. Kasi yandi basikaka na dibulu yango. Ba losaka Klisto na kati ya dibulu, mpe Yandi basikaka kuna. Mpe katuka kuna yandi kwendaka vwanda na kisika ya kulutila zulu yina vwandaka na zulu ya ntoto. Amen! Joseph kwendaka vwanda na diboko ya kibakala ya Pharaon; mpe Yesu kwendaka vwanda na diboko ya kibakala ya Nzambi. Na kumekama ya yandi, na ntwala ba zangula yandi... Yesu, na ntwala ba zangula Yandi, lutaka na kumekama.

⁶³ Na yina, mu ke kwikila ti ya vwandaka Billy Sunday, évangéliste ya nene, yina tubaka, “Na konso—konso yinti ya vwandaka na difuku mosi ya Bawanzio na kilumbu ba komaka Yandi na kulunsi, ba tubaka, ‘Basisa kaka diboko ya Nge mpe pesa beno muswa. Beto ke soba mambu nionso awa.’” Kasi Yandi lendaka sala yawu ve.

⁶⁴ Caïphe tubaka, “Yandi me kukivulusa yandi mosi; yandi lendaka vulusa bayankaka ve.” Yandi zabaka ve ti ya vwandaka tuba mbote ve. Kana Yandi kukivulusaka Yandi mosi, Yandi lendaka vulusa bayankaka ve. Na yawu, Yandi kukipesaka Yandi mosi, samu na kuvulusa bayankaka. Beno me mona, ba vwandaka meso ya kufwa na yawu. Ntangu yayi bawu...

⁶⁵ Na yina ntangu ba zangulaka yandi kuna, to, na ntwala ba zangula yandi, na kumekama ya yandi... Beno bambuka moyo, ba tulaka Joseph na boloko samu yandi zabaka diambu ve.

⁶⁶ Ba-Romain, to, général ya Israel, na nkumbu ya Potiphar; Potiphar kwendaka, mpe yandi salaka nzietolo. Yandi vwandaka na kento mosi ya kitoko, mpe kento ya yandi bokilaka Joseph na kati ya yinzo samu na kusala kima mosi, mpe yandi zolaka ti Joseph kusala kima mosi ya yimbi. Mpe yandi vwandaka ya kwikama na Nzambi. Mu ke tuba na beno, ba kele ntangu nionso...

⁶⁷ Beno Bakento, mu me nganina beno; ntangu yayi mu ke baka kisika ya beno, na mwa ntangu fioti. Beno me mona? Kento kele mbeki mosi ya kukondwa ngolo. Mu zaba ti ya lenda vwanda ve na bakala ya yimbi na ntwala ya vwanda na kento ya yimbi. Kasi babakala yina me zaba yawu, babakala beno yina me zaba ti beno kele mwana ya Nzambi, mpe beno ke bebisaka kento mosi, nsoni na beno; ata nyonso yina yandi me sala. Yandi kele mbeki ya kukondwa ngolo, mpe beno zaba yawu. Kana yandi me basika na nzila, yandi me banda na kusala mambu yina kele na nzila ve, beno baka yandi na diboko mpe beno tuba na yandi mutindu mpangi ya beno ya kento. Beno kele mwana ya Nzambi. Beno sala ve mambu yina ya yimbi. Beno tala Joseph, yandi vwandaka mbandu samu na beno.

⁶⁸ Mpe ntangu kento ya Potiphar, kento yayi ya kitoko, ya lukumu, yina ba vwandaka zitisa mingi, mosi ya bakento yina ba vwandaka zitisa mingi na kati ya yinsi, bondilaka yandi mpe salaka nionso samu na kundimisa yandi. Mpe yandi balukaka, mpe yandi kangaka yandi mpe yandimekaka na kubenda yandi pene-pene ya yandi. Mpe yandi nwanaka tii kuna yandi bikaka mpe kazaka ya yandi, mpe yandi tinaka yandi mbangu. Yinga, tata. Mpe ntangu yandi kwisaka, ba zonzaka na yandi luvunu, yandi tubaka ti yandi kwisaka samu na kubaka yandi na ngolo, mpe yandi bikaka . . . mpe yandi bikaka kazaka ya yandi kuna. Mpe samu na yina ba tulaka yandi na boloko. Kasi, na kati ya boloko, Nzambi vwandaka na yandi, ya vwandaka konso kisika yina ba tulaka yandi.

⁶⁹ Yandi vwandaka kifwani ya Mwana ya ntomoso. Bima nionso Joseph vwandaka sala kutomaka. Mpe ntangu Yesu ke vutuka na Millenium, ya kele samu na yina bisika ya kuyuma ke basisa bafelele mutindu felele yayi rose. Mambu nionso Yandi ke sala ke toma. Yandi kele Mwana ya ntomoso. Konso kisika yina beno ke tula Joseph, ya ke sakumuka. Kisika nionso Yesu kele, ya ke sakumuka. Na yawu, beno kotisa Yandi na kati ya ntima ya beno mpe beno sakumuka.

⁷⁰ Na yawu beto me mona ntangu yayi, ti, na yina ba tulaka Joseph na boloko. Mpe na kati ya boloko ya vwandaka na babakala zole; mosi kuzimbanaka, mpe yankaka kuzwaka mpulusu. Yesu, na kati ya kumekama ya Yandi na zulu ya kulunsi, muyibi mosi zimbanaka mpe yankaka kuzwaka mpulusu.

⁷¹ Ntangu ba zangulaka Yandi, Yandi kwendaka na diboko ya kibakala ya Nzambi. Ntangu ba zangulaka Joseph, yandi kwendaka na diboko ya kibakala ya Pharaon, mpe muntu mosi ve lendaka tuba na Pharaon kukondwa kutuba ntete na Joseph mpe kubaka muswa.

Mpe ntangu Joseph vwandaka basika na yinzo ya mfumu . . . Oh, la la! Ntangu Joseph vwandaka basika na yinzo ya mfumu, bampungi vwandaka kubula, mpe bantu vwandaka kwenda na ntwala ya yandi, ba vwandaka tuba, “Beno fukama! Joseph ke kwisa!” Amen!

Mpe ntangu Yesu ke katuka na diboko ya kibakala ya Ngolo kuna na zulu, bampungi ke bula. Mpe mabolongo nionso ke fukama, mpe yinwa nionso ke ndima ti, “Yesu ke kwisa!” Ya kieleka! Kasi kana . . .

⁷² Mpe, beno bambuka moyo, ntangu ba losaka yandi na bampangi ya yandi, yinki yandi salaka? Yandi bakaka kento mosi ya Bantu ya makanda; yandi bakaka kento mosi ya Egypte. Ntangu ba katulaka Yesu na bampangi ya Yandi kuna, ba-Juif, Yandi kwelaka Kento mosi ya Bantu ya makanda. Kasi

ntangu yayi, na manima ya bamvula, na manima ya kubuta bana, Ephraïm na Manassé, yandi kumaka na dibuta.

⁷³ Na yina, kilumbu mosi, mpangi ya yandi kwisaka kutala yandi. Beno tala. Beto zaba disolo yango, mutindu yandi tulaka kima yina kuna na kati, samu ba kwenda na yawu. Mpe yandi salaka mutindu yandi zaba ve ndinga ya bawu; yandi vwandaka na mutendudi, samu na kutendula ki-Hebreux, na ntangu yandi vwandaka yandi mosi Hebreux. Mpe mpangi ya bawu kwisaka kuna. Bawu zabaka yandi ve. Yandi vwandaka ntinu mosi ya ngolo.

Mpe na ntangu yayi, Klisto ke na kutala ba-Juif, ke belusa bambevo na kati ya bawu mpe nionso yina, mpe ba ke zaba kaka ve Nani Yandi kele, Mesiya yayi.

Beto banda na nzila ya 27 ya kapu 44.

Mpe kisadi ya nge tata ya munu me tuba na beto, Beno zaba ti kento ya munu me butila munu—kento ya munu me butila munu bana zole:

Mpe mosi ya bawu me basika na munu, . . .

Yina vwandaka Joseph, yandi yina kaka ba vwandaka zonzila.

. . . mpe mu tubaka, Ya kieleka ba me panzaka yandi bitini-bitini; mpe mu monaka yandi diaka ve tii bubu yayi:

Mpe kana beno baka munu diaka yayi, mpe yandi kutana na mpasi, beno ke kulumusa bansuki ya munu ya mpembe na kiadi na kati ya ntoni.

⁷⁴ Ba vwandaka na Benjamin ya fioti kuna, leki ya yandi. Beno zaba nani Benjamin ke talisa? Nkonga yayi ya malu-malu ya ba-Juif ya kieleka, ya kieleka yina ke na kuvukana kuna na ntangu yayi samu na kusala nkama na makumi yiya na yiya ya mafunda, dikanda yayi—yayi ke na kusalama. Ya ke ba-bandu yayi ve ya Wall Street, ve, ve; bayina ke kaka bantu yina ke kufwa na munduki. Ba ke ba-Juif ve. Ba ke ba-Juif ve. Ba-Juif ya kieleka kele ba-Benjamin yayi ya fioti ke na kukwisa kuna, mpe bayina me kuwaka ata fioti ve Ndinga ya Yesu Klisto.

Ntangu yayi kwisa vutuka na munu. . . mpe tata ya nge. . . mpe tata ya munu, mpe mwana ya bakala kele na beto ve; na kumonaka ti luzingu ya yandi vwandaka ya kukangama na mwana yayi ya bakala;

⁷⁵ Luzingu ya Nzambi Yandi mosi kele ya kukangama na Israel. Yandi me kwelanaka na yandi. Beto ke tubila yawu na mwa ntangu fioti, kana Mfumu kuzola. Yandi me kwelana na Israel. Luzingu ya Yandi ke ya kukangama na yandi. Ya ke kaka mutindu mu kele ya kuvukana na Mama Branham yina kele kuna na manima, kento ya munu, mpe beno kele ya kuvukana na kento ya beno. Luzingu ya beno me bumbama na yawu. Mpe Nzambi

me kwelana na Israel. Mpe yinki ya vwandaka? Jacob tubaka, “Luzingu ya munu me bumbama mpe me kangama na mwana yayi. Mu ke...”

Mpe ya ke salama ti, ntangu ya monaka ti mwana kele na beto ve, ...

Joseph zolaka kubumba mwana yango, beno zaba. Beto zaba disolo.

...mpe yandi ke kufwa, tata ya yandi: mpe bisadi ya nge ke kulomusa bansuki ya mpembe ya kisadi ya nge tata ya beto na kiadi na kati ya ntoni.

Beno kuwa kubondila yina Ruben ke na kusala ntangu yayi.

Samu kisadi ya nge me vutula mvutu na mwana ya nge...na tata ya munu, na kutubaka, Kana mu me nata ve...mu me nata yandi ve na nge, na yina mu ke vwanda ya kubwa na ntwala ya tata ya munu mvula na mvula.

Ntangu yayi, lemvo ya nge, pesa muswa ti kisadi ya nge kuvwanda na kisika ya mwana...

Oh, la la! Beno me mona, ya vwandaka ya kutelema kuna na ntwala ya Joseph, mpangi ya yandi. Ya ke Joseph, mpe yandi vwandaka zaba yandi ve. Oh, beno vingila tii na ntangu Millenium ke banda, mpangi!

...ntangu yayi na kisika ya mwana mutindu mpika ya mfumu ya munu; ...

Beno kuwa yandi, kubokila yandi, “mfumu.”

...mpe bika mwana kukwenda na bampangi ya yandi.

Na yina wapi mutindu mu ke vutuka na tata, kana mwana kele na munu ve? mu zola mona ve mpasi yina ke kumina tata ya munu.

⁷⁶ Yandi vwandaka kudodokila, ya vwandaka pesa luzingu ya yandi mosi! Mutindu yina ba-Juif ke telema kuna na maboko ya kutandula! Beno tala mbote. Beno tala mbote ntangu yayi kuna 45, nzila... Beno kuwa na bukebi, beno kondwa yawu ve. “Ntangu Joseph lendaka...”

Na yina Joseph lendaka ve...-kanga yandi—kukikanga yandi mosi na ntwala ya nionso yayi vwandaka ya kutelama na yandi; ...

Mpangi, yina ke ntangu ba ke sukisa disumu. Kukondwa lukwikilu ke panzana.

...mpe yandi bokaka, mpe yandi salaka ti bantu nionso kukwenda...ntama na yandi. Mpe muntu mosi ve vwandaka na yandi, ntangu Joseph kukitalisaka yandi mosi na bampangi ya yandi.

⁷⁷ Yinki yina? Ata mpe kento ya yandi vutukaka na yinzo ya kimfumu. Oh, la la! Kento ya makwela na Nkembo, ntangu Yesu ke vutuka (beto ke mona yawu awa.) samu na kukitalisa Yandi mosi.

Mpe yandi dilaka na ndinga ya ngolo: . . .

Joseph lendaka diaka ve kukikanga, mpe yandi bokaka.

. . . mpe ba-Egyptien mpe yinzo ya Pharaon kuwaka yawu.

⁷⁸ Kuna na yinzo ya kimfumu, bawu kuwaka Joseph kuboka. Ntangu yayi, yina vwandaka kifwani ya Klisto ke kutana na ba-Juif, na yina, Yandi zaba ti Yandi kufwaka meso ya bawu samu ti beto kuzwa siansi. Kasi ntangu Yandi ke kwisa vutuka diaka na bawu, disumu ya Israel ke suka.

Mpe Joseph tubaka na bampangi ya yandi, mu kele Joseph; . . .

Yinki beno ke banza Yesu ke tuba? “Mu kele Mesiya ya beno. Mu kele Yina beno komaka na kulunsi.”

. . . keti tata ya munu ke zinga? Mpe bampangi ya yandi lendaka pesa yandi mvutu ve; samu ba vwandaka ya kuyangama na ntwala ya yandi.

⁷⁹ Oh, mu fwana telama awa na mwa ntangu fioti. Beto baka Zacharie kapu 12. Beno baka na munu ntangu yayi Buku ya Zacharie, kapu 12 ya Zacharie. Mpe ntangu yankaka mu ke baka mwa ntangu mingi samu na kubanda kulonga yayi, kasi mu—mu banza ti mutindu yina ve. Mpe mu—mu zola ti beno simba yawu, mingi.

⁸⁰ Zacharie, beto baka kapu 12 ya Zacharie, mpe beto tala yina Yandi ke tuba kuna ntangu Yandi ke telama na ntwala ya bampangi ya Yandi. Zacharie 12, na 10. “Kusukisa disumu,” ntangu yayi. Mbote mingi, kapu 12 na 10.

⁸¹ Beno tala. Mpe ntangu yayi yandi ke na kutubila awa ndambu yina; siège ya Jérusalem; niama mpe makesa ke katuka, mpe nionso yina; bima nionso me kuma na nsuka ntangu yayi; ya me kuma pene-pene ya Millenium, Millenium ke zola kubanda ntangu yayi.

Mpe mu ke mwangisa na zulu ya yinzo ya David, mpe na zulu ya bayinzo ya Jérusalem, mpeve ya (yinki?) lemvo . . .

Amen! Lemvo ya ngitukulu!

. . . na zulu ya yinzo . . . bwisi ya Jérusalem, (“mbanza ya santu” ya Daniel), mpeve ya lemvo mpe ya kubondila: mpe ba ke tala na munu yina ba tobolaka, mpe ba ke dila yandi, mutindu ba ke dilaka mwana ya yandi kaka mosi, mpe ba ke dila yandi na kiadi, mutindu ba ke dilaka mwana ya ntete.

⁸² Beno kuwa, yinki matanga ya ke vwanda ntangu Yandi ke telama kuna, Yandi ke kukitalisa pwelele na bawu, mutindu Joseph salaka! Beno kuwa.

Mpe na kilumbu yina matanga ke vwanda ya nene na Jérusalem, mutindu matanga ya Hadad-...

Mu lenda ve kubokila nkumbu yina, H-a-d-a-d-r-i-m- - o- . . .

. . . *Hadadrimmon na . . . Megiddon—Megiddon.*

Mpe na yinsi ya ke vwanda na matanga, konso dibuta na kingenga; dibuta ya yinzo ya David na kingenga, mpe bakento ya bawu na kingenga; mpe dibuta ya yinzo ya Nathan na kingenga, mpe mabuta ya bawu na kingenga;

. . . *yinzo ya Levi . . . mpe bakento ya bawu mpe mabuta na kingenga; . . . mpe Simeon na ya yandi na kingenga;*

Mpe mabuta nionso yina me bikala, mabuta nionso . . . na bakento ya bawu na kingenga.

⁸³ Ba ke vwanda na nsoni mungi samu na bawu mosi, ntangu ba ke telama kuna mpe ba ke mona Yandi yina bawu komaka na kulunsi mpe bawu mangaka, me telama kuna, Joseph ya bawu ya ntalu. Ya ke vwanda na matanga ya nene! Mpe ba ke tuba, "Wapi Nge me baka bidimbu yayi ya bamputa?"

⁸⁴ Yandi tubaka, "Na yinzo ya bankundi ya Munu." Beno me mona yina mu zola tuba? Samu na kusukisa disumu, ya kukondwa lukwikilu, ya kele samu na yawu Yandi ke kwisa.

⁸⁵ Mpe mvula yayi ya makumi sambwadi ya Daniel, sabala ya makumi sambwadi, mu zola tuba, ya ke kwisa samu na kusukisa disumu, kukatula yawu. Beno me bakula ntangu yayi? Yinki kele ya ntete? "Samu na kusukisa kukolama." "Samu na kusukisa disumu." Numelo ya tatu, "Samu na kusungika disumu ya nkú." Beno yina ke na kusonika.

Mu vwandaka na Masonuku yankaka pene ya sambanu kuna, kasi mu ke bika yawu, samu mwini kele ngolo. Beto zola baka ntangu ya yinda ve. Mu zola baka yawu mutindu mu lenda, kasi mu ke baka beno ntangu ya yinda ve. Mbote mungi.

⁸⁶ "Samu na kusungika disumu ya nkú." *Disumu ya nkú* kele "kusala yimbi," mutindu bawu salaka na kulunsi. Yandi salaka mulemvo, kasi ya ke tula yawu na bawu ve. Ba tulaka yawu na bawu ve. Samu na yinki? Samu ba vwandaka meso ya kufwa mpe bawu lendaka mona yawu ve. Mpe samu na yinki bawu vwandaka meso ya kufwa?

Beno ke tuba, "Mbote, ntangu yankaka, bubu yayi . . . samu mu ke meso ya kufwa." Beno ke meso ya kufwa na luzolo. Ba vwandaka meso ya kufwa samu Nzambi kufwaka meso ya bawu. Kasi beno ke meso ya kufwa samu beno me zola kuvwanda meso

ya kufwa. Ya ke na mulemvo ve samu na beno. “Kana beno ke kwikila ve ti Munu kele Yandi,” Yesu tubaka, “beno ke kufwa na disumu ya beno.” Ya kieleka.

⁸⁷ Ntangu yayi beto baka diaka Zacharie, kapu 13. Ntangu yayi beto kuwa awa. “Samu na kusungika.” Ntangu yayi, wapi yayi... Mu vwandaka zola ti muntu mosi, kuwa yayi—kuwa yayi, kasi ntangu yankaka Mfumu ke yidika yawu na mutindu nionso.

Na kilumbu yina ya ke...

⁸⁸ “Na kilumbu yina.” Docteur Scofield yina ya ke pesa awa na banoti ya yandi, to yintu ya paragraphe ya yandi, “Ndambu... Ndambu yina balulaka ntima talaka na kulunsi.”

⁸⁹ “Samu na kusungika disumu ya nkú.” *Disumu ya nkú* kele “kima ya yimbi yina beno me sala, yina beno me zaba mbote, ti beno lenda sala yawu ve.” “Kana mu me kotisa disumu ya nkú na kati ya ntima ya munu, Nzambi ke kuwa munu ve.”

⁹⁰ Ntangu yayi, na Zacharie kapu 13, beto banda na nzila ya ntete—na nzila ya ntete.

*Na kilumbu yina ya ke vwanda na kiziba ya kuzibula
na yinzo ya David mpe bwisi ya Jérusalem samu na
disumu mpe... mvindu.*

⁹¹ Ya ke vwanda na yinzo ya kuzibula. Beno landila; beto lenda tanga yawu nionso. Mu zola ti beno sonika yawu samu ti beno ke tanga yawu. Kasi ntangu yayi, yina mu me sonika awa kele kubanda na nzila ya 6 mpe kutanga tii na 10. Mbote mingi, beto tanga ntangu mpe beto tala, beto tanga tii na 9, mu zola tuba.

*Mpe ba ke tuba na yandi, ti wapi... Wapi me katuka
bamputa yayi na diboko ya nge? Na yina yandi ke
tuba, Yina... yina mu me vwandaka... (Beto tala)...
vutulaka mvutu, Ya ke na yinzo ya bankundi ya munu
mu me kuzwa yawu.*

*Mbele, telama, nge kwenda nwanisa muvungi ya
mameme, mpe nwanisa muntu yina kele nkundi ya
munu, me tuba MFUMU ya makesa: bula muvungi, samu
mameme kupanzana: mpe mu ke balula diboko ya munu
na bana ya fioti.*

⁹² Ntangu yayi, Yesu tangaka Masonuku yayi. Beno me mona, “Bula Muvungi, samu mameme kupanzana.” Kasi beno tala paragraphe yina me landa. Yandi me tanga yawu kaka tii kuna. Kasi beno tala mbote yina nsasa yina me landa ke tuba, kitini yina me landa. “Mpe Mu ke balula diboko ya Munu na bana ya fioti.” Yinki? Nkonga ya Benjamin yina ke na kukwisa ntangu yayi. “Mu ke balula diboko ya Munu na bana ya fioti.”

⁹³ “Bula Muvungi.” Israel, ntete, Israel bulaka Muvungi, mameme kupanzanaka na yinza ya muvimbba. Kasi Nzambi tubaka, “Mu ke balula diboko ya Munu, samu na kukwenda

kusosa bana yina ya fioti na kilumbu ya nsuka.” Yinki ntangu? Ntangu mulemvo ya disumu ya nkú me salama.

⁹⁴ Israel ke kuzwa mpulusu, bawu nionso. Beto baka Esaïe. Esaïe, kapu 66 ya Esaïe, mpe beno tanga yawu na mwa ntangu fioti. Mpe beno ke mona yina Nzambi me tuba samu Israel kuzwa mpulusu, ya ke vwanda bantangu yikwa samu Israel kuzwa mpulusu. Beno tala mbote wapi mutindu ya ke vwanda nswalu. Na Esaïe, kapu 66 mpe nzila ya 8. Kana beno zola kutanga yawu nionso, mbote mingi.

*Nani me kuwaka ntete mambu ya mutindu yayi?
nani me monaka yawu ntete? Ba ke buta yinsi ya
muvimba...na kilumbu mosi...na kilumbu mosi? ...
kasi Sion mpasi ya kubututa me simba yandi, yandi ke
buta bana ya yandi.*

⁹⁵ Kaka na ntangu Sion monaka ti yina vwandaka Mesiya ya bawu, ya me butuka mbala zole, na kilumbu mosi. “Samu na kusungika masumu, mpe kusungika disumu ya nkú, mvindu.” Oh, la la! Bawu salaka kima ya yimbi, yina vwandaka mbote ve. Mulemvo kusalamaka samu na disumu ya bawu ya nkú.

⁹⁶ Numelo ya yiya. “Samu na kunata kieleka ya mvula na mvula.” Yawu yina kima ya yiya Yandi me kwisa kusala. Ya yiya, yinki Yandi me kwisa kusala, “Samu—samu na kunata kieleka ya mvula na mvula.” “Samu na kusukisa disumu; mulemvo; mpe samu na kunata kieleka ya mvula na mvula.” Ntangu kukolama ya Israel ke suka... Ntangu kukolama ya Israel...

⁹⁷ Ntangu yayi beto ke... Mu zola ti beno simba yayi, samu ntangu beto ke tubila kento yina, mpe dalango yina ba me losa, beno ke vutuka diaka na Masonuku yayi. Beno sonika Yawu mbote-imbote. Ntangu kukolama ya Israel me kuma na nsuka, Satana, yina kele mufundi ya bawu mpe mufundi ya beto, Satana ba ke tula yandi kidimbu na dibenga ya yinda. Na wapi ntangu? Ntangu ba ke nata kieleka ya mvula na mvula, kima yina ke vwanda na nsuka ve, yina nionso salaka ti nsoki kuvwanda ba ke katula yawu.

⁹⁸ Beto baka Apocalypse kapu 20 mpe nzila ya 13, na mwa ntangu fioti, mpe beto tanga awa na mwa ntangu fioti. Apocalypse 20, mpe 13... Ve, beno lemvokila munu. Apocalypse... 1 tii na 3, ya kele. Mu vwandaka mona ve mwa kidimbu ya fioti na kati ya yawu. Mutoki ya munu awa me kubwa na meso ya munu. Apocalypse kapu 20, mpe beto tala.

*Mpe na manima ya mambu yina mu monaka wanzio
mosi yina katukaka na mazulu mpe kulumukaka na
ntoto, yandi vwandaka ya kusimba banfungula ya
dibenga ya yinda mpe muniololo mosi ya nene na diboko
ya yandi.*

... Yandi nataka dalango, nioka ya ntama, yina kele diabulu, mpe Satana, mpe kangaka yandi bamvula funda,

Mpe wanzio losaka dalango na kati ya dibenga ya yinda, mpe yandi kangaka yawu, mpe tulaka bisengo samu na kukanga yawu mbote, ti yandi ke vuna dyaka ve yinsi, tii ntangu ke lunga bamvula funda: mpe na manima bamvula funda yina...ba fwana kupesa yandi mwa ntangu ya kimpwanza.

⁹⁹ Samu na kunata kieleka ya mvula na mvula... “Samu na kunata kieleka ya mvula na mvula,” Satana na kati ya dibenga ya yinda. Mpe ntangu Yandi ke sala mutindu yina, mpe ke tula diabulu kidimbu yina vwandaka vuna bantu.

¹⁰⁰ Ntangu yayi beto vutuka kuna samu na kubaka Habakuk, kapu 2. Habakuk, kapu 2. Mpe ntangu yayi beto ke mona samu na yinki Yandi tulaka kidimbu na nioka yayi ya ntama, mpe samu na yinki ya salaka yawu, mpe yina ke salama na mbala mosi ntangu yandi ke tula yandi kidimbu. Mu ke zolaka yawu, beno ve? Ya—ya ke nata beto na kuzaba kima mosi. Habakuk, Habakuk, kapu 2 mpe nzila ya 14, mu banza yawu yina, mu zola tanga. Ntangu yayi ke salama... Beno tala mbote.

Kilumbu kele ntoto ke fuluka na luzabu mpe nkembo ya MFUMU, mutindu nzadi ke fulukaka na masa.

¹⁰¹ *Brrrrr! Oh! Fiou!* Na nzonzolo yankaka, ntangu ba ke kanga mbeni, ya ke vwanda nsuka ya disumu, ba ke nata kieleka ya mvula na mvula, Satana ba me tula yandi kidimbu na dibenga ya yinda, mpe luzabu ya Mfumu ke fuluka na ntoto mutindu nzadi ke fulukaka na masa. Amen! Nkembo na Nzambi! Ya ke na kukwisa, mpangi, ya ke na kukwisa! Bakento ke vwanda bamama, mpe babakala ke vwanda batata. Amen!

Ntangu luzabu ya Mfumu ke fuluka na ntoto
mpe na nzadi mpe na matuti;
Mpe, oh, ntima ya munu ke na kuboka, ke
na kuvumuna samu na kilumbu yina ya
kukuula,
Ntangu Yesu ya beto ke vutuka diaka na ntoto.

¹⁰² Amen! Mbote mingi. Ntangu yayi, Millenium ke vwanda na ntangu yina. Ya ke ntangu ya Millenium, ntangu ba ke tunga Mbanza. Ya yiya... Mu kele diaka na Masonuku pene ya sambanu, kasi beto ke sala nswalu. Ntangu yayi, ntangu beto ke vutuka kuna, mu ke baka Masonuku yayi yankaka; kasi ya ke samu na kupesa beno dibanza ya muvimba.

¹⁰³ Numelo ya tanu. “Samu na kutula kidimbu na vision mpe profesi.” Beno me mona, Wanzio yina kwisaka samu na kutula kidimbu na vision mpe profesi.

Mu—mu ke zolaka ve kutuba mutindu yayi. Kasi, nsoniki mosi, yina mu vwandaka tanga kilumbu yina, yandi vukisaka nionso! Yandi tubaka “Yina ya vwandaka . . .”

Ntangu yayi, kaka samu na katalisa buzoba . . . Oh, beno lemvokila munu, mu zolaka tuba mutindu yina ve. Beno lemvokila munu. Mu zolaka tuba mutindu yina ve, ya kieleka mu zolaka tuba mutindu yina ve. Ve. Muntu mosi ya kukondwa kupakulama, beno me mona.

Muntu yango tubaka, “Beno me mona awa ti ba-vision mpe ba-profesi ba ke pesaka yawu ntangu nionso na dibuundi ya ba-Juif.” Mpe yandi tubaka, “Kubanda na ntangu ya Daniel, na manima ya Daniel, ya zola tuba ti ba ke kuzwa diaka ve ba-vision to ba-profesi.” Yandi tubaka, “Bima yayi nionso ba ke tubila bubu yayi, samu na kuvwanda na ba-vision mpe ba-profesi, bima yayi nionso kele ya diabulu,” ti, “ba-vision mpe ba-profesi ke vwandaka diaka ve.”

Mpangi, ya vwandaka na makumi na zole ya ba-profete na manima ya Daniel. Mpe ya vwandaka na Jean Baptiste. Ya vwandaka na Yesu Klisto. Ya vwandaka na ba-profete na kati ya Ngwisani ya Malu-malu. Ya vwandaka na ba-vision. Ya vwandaka na Bawanzio.

Wapi mutindu muntu lendaka tuba diambu ya mutindu yina? Kasi, beno me mona, yina ke samu na lukanu ya kimuyimi, kumeka katalisa na bantu kima mosi na ngolo, kusala yawu mwa malongi ya dibuundi, to mwa kima mosi ya kukondwa mfunu, kukumisa yawu kieleka samu na bantu. Mpe kana bantu ke na Mpeve-Santu ve, ba ke vunama na yawu.

¹⁰⁴ Ntangu yayi, beto baka ve yina muntu mosi me tuba. Ntangu yayi, ya ke na Masonuku ve ke siamisa yawu. Na yawu wapi mutindu mu lendaka baka yawu? Mbote, beto tala yina kele kieleka kutula kidimbu yango. Beno tala mbote! Ya me kwisa samu na yawu, samu na kutula kidimbu na vision mpe profesi.

¹⁰⁵ Ntangu yayi, beto vutuka kaka na Buku ya Daniel, kisika beto me vwanda. Kuna na Buku ya Daniel, beto ke mona yina kaka Ya me tuba. Ntangu yayi beto baka Daniel kapu 12. Ntangu yayi, beto baka Daniel 12, ntangu yayi, beto lenda banda. Mpe beno tanga kubanda . . . Ntangu beno ke vutuka na yinzo, mu zola ti beno tanga kubanda na nzila ya 1, tii na nzila ya 4.

Mpe na ntangu yina Mikayele ke telama . . . ntinu ya nene yina ke telama samu na bana ya bantu ya yandi: . . .

Ntangu yayi, yayi ke vwanda na ntangu ya nsuka.

. . . mpe ya ke vwanda na ntangu ya muvusu, mutindu ya vwandaka ata fioti ve kubanda . . . yinsi . . .

Yina ke ntangu mbeni ya Klisto, munati mpunda ya Kidimbu ya Ntete ke basika, ntangu yandi ke kota na kisalu.

. . . ata mpe tii na ntangu yayi: . . .

Ya kele ve ntangu yina Titus bakaka bibaka ya Jérusalem. Yina vwandaka kaka kisika mosi. Beno tala mbote mbeni yayi ya Klisto, ntinu yina ke kwisa, beno tala mbote ntangu yandi ke kwisa.

...ata mpe tii na ntangu yina: mpe na ntangu yina bantu ya nge ba ke kukuula bawu, yina nionso ke na nkumbu ya yandi na kati ya buku.

Alleluia! “Bantu ya nge,” Israel, “ba ke sonika yandi na kati ya buku.”

Mpe mingi ya bayina me lala na kati ya putulu ya ntoto ke vumbuka, bayankaka samu na luzingu ya kukonda nsuka, mpe bayankaka samu na nsoni mpe kiadi ya kukonda nsuka.

¹⁰⁶ Wapi mutindu ya lendaka vwanda ntangu Titus bakaka bibaka ya Jérusalem? Wapi mutindu ya lendaka salama? Ya lendaka salama ve. Beno me mona, yandi ke na kutubila nsuka ya ntangu, na mvumbukulu. Ya kieleka? Ntangu yayi:

Mpe bayina kele na ndwenga ke sema mutindu nkembo ya zulu; mpe bayina nataka na lweka... bayina longaka kieleka na bantu mingi... bambwetete ya mvula na mvula...

Beno kuwa! Yawu yayi, kutulama kidimbu ya kieleka, ya kusungama.

Kasi nge, O Daniel, bumba bandinga yayi, kanga buku, tii na ntangu ya nsuka:...

¹⁰⁷ Yinki yayi? Oh, alleluia! Beno me mona yawu, kalasi? Luzayikisu yayi ya Yesu Klisto, mpe Ngolo ya Yandi, ya Nkwizulu ya Yandi, ya ntangu ya nsuka, ba kangaka yawu tii na ntangu yayi. Yawu yina Yandi me kwisa kusala. Ya me bumbama na bantu ya mayele; kuyituka ve, ba ke zola kutula, “kutulama yayi ya kidimbu,” kuna, na “ba-profete ve,” mpe nionso yayi na ntangu me luta. Ya ke simba ve. Kasi vision, vision yayi, ba kangaka yawu tii na ntangu yayi awa. Mpe ya ke kisika yina mu ke tula lukwikilu ya munu, ti Nzambi ke monisa pwelele basabala makumi sambwadi yayi. Amen! “Kanga yawu,” Yandi tubaka, “tii na ntangu ya nsuka. Kanga Bandinga yayi mpe tula kidimbu na Buku tii na ntangu ya nsuka.”

¹⁰⁸ Yinki Yandi salaka? Samu na kutula kidimbu na vision mpe profesi! Daniel pesaka profesi samu na bima yayi. Yandi monaka yawu na vision, mpe Wanzio kulumukaka samu na kutula kidimbu na vision, mpe samu na kutula kidimbu na profesi. Bawu lenda kutanga yawu, kasi ba ke bakula yawu ve, tii na ntangu ya nsuka. Ntangu ya nsuka, yinki kele ntangu ya nsuka? Nsuka ya sabala ya makumi sambwadi, ntangu ntinu yayi, mbeni ya Klisto, ke talisama pwelele, na ntangu yayi, na kukibokilaka yandi mosi Nzambi. Wapi mutindu beto me zaba

ti ba me tula yawu kidimbu tii na ntangu ya nsuka? Daniel me manisa; yayi kele kapu ya nsuka ya Daniel.

¹⁰⁹ Mpangi-kento Simpson me tuba na munu na manima ya midi yayi, yandi tubaka, "Mpangi Branham, mu me tanga Buku nionso ya Daniel. Mu—mu me zaba kaka kima ve na manima kutanga yawu, ntangu mu me manisa, mutindu mu me banda." Tala yina ya kele, Mpangi-kento Simpson, kana nge kele awa na nkokila yayi. Mu ke kwikila mu me mona yandi ya kuvwanda kuna. Mu tubaka kima mosi ve na pusu. Mu vwandaka pima, samu mu banzaka ti mbala yankaka mu ke vutukila yawu.

Kasi, vision yina Daniel monaka, kuna pene-pene ya nzadi, vwandaka ya kukanga, "tii na ntangu ya nsuka." Ya ke... Beno bika mu kwenda na ntwala mpe mu ke tanga yawu kuna. Beno me mona?

Kasi nge, O Daniel, kanga bandinga yayi, mpe kanga buku, tii na ntangu ya nsuka: mingi ke kwenda mbangu awa mpe kuna, mpe luzabu ke kuma mingi.

Mpe Munu Daniel talaka, mpe, tala, ya vwandaka... zole,...mosi na simu yayi...ya nzadi, mpe yina yankaka na simu yina ya dikumu ya nzadi.

Mpe mosi tubaka na bakala yina lwataka bilele ya—ya lino, yina vwandaka na zulu ya bamasa ya nzadi, Ya ke vwanda bantangu yikwa tii na nsuka ya mambu yayi ya ngitukulu?

Ntangu yayi beno kuwa.

Mpe mu waka bakala yina lwataka bilele ya lino, yina vwandaka na zulu ya bamasa ya nzadi, ntangu yandi telemisaka na zulu diboko ya yandi ya kibakala mpe diboko ya yandi ya kikento, mpe zengaka ndefi na yina ke zinga mvula na mvula ti ntangu ke vwanda diaka ve, ntangu, ndambu ya ntangu;...

Ntangu yayi, beto me kuma kaka—kaka kisika yango, "Ntangu, ntangu, mpe ndambu ya ntangu." Ntangu yayi beno tala ntangu beto ke kuma na basabala makumi sambwadi ya Daniel, beno ke mona mutindu ya me fwanana. Ya ke kuna mansweki ke talisama pwelele. Mbote mingi. "Ntangu, ntangu, mpe ndambu ya ntangu."

...mpe ntangu yandi ke...("yandi," kiyengilu kimuntu ntangu yayi, mbeni ya Klisto)...ke mani-... manisa manisa na kubuka ngolo ya bantu ya santu, (yina ke ntangu yandi ke buka ngwisani ya yandi na kati-kati ya sabala), bima yayi nionso ke salama. (Amen.)

Mpe mu waka, kasi mu bakulaka ve: na yina mu tubaka, O...Mfumu, yinki ke vwanda nsuka ya bima yayi?

Mpe yandi tubaka, Kwenda, Daniel: samu bandinga yayi ba me kanga yawu mpe ba me tula yawu kidimbu tii na ntangu ya . . . [Dibuundu me tuba, “Nsuka.”—Mu.]

Oh, beno zimbana yawu ve!

. . . tii ntangu ya nsuka.

Mingi ke kuma ya kuvedila, mpe ba ke kuma mpembe, mpe ya kukondwa mvindu; kasi bantu ya yimbi ke sala mambu ya yimbi: mpe ata muntu ya yimbi mosi ve ke bakula; kasi bantu ya ndwenga ke bakula.

¹¹⁰ Nsangu ya ntangu ya nsuka ke monisa yawu pwelele; nsungi ya nsuka ya dibuundu. Nkembo! Fiou! Beno me kuma kisika yango! Oh, la la! Ya ke ningisa munu, na kubanza yawu, mansweki! Bima yina dibuundu ya yinza ke kangila bawu meso, mpe ke tuba, “Ya ke buzoba.” Mansweki ya Yina Yesu Klisto vwandaka; Muntu ya tatu ve, Muntu ya zole ve, Muntu ya tatu ve, kasi Muntu ya Nzambi. Mansweki yayi nionso ya Nzambi ke monisama pwelele, samu ya me sonama na kati ya Buku yayi, mpe ya ke monisama pwelele na nsungi ya ntangu ya nsuka. Ba ke mona yawu diaka ve na ba-seminere, na balukolo, na ba-denomination, mutindu ba-Juif lendaka mona ve ti Yesu vwandaka Mesiya. Kuyituka ve ba ke meka na kubanza ti beno ke bilawu. Kuyituka ve ba ke banza ti beno ke bazoba. Kuyituka ve ti ba lenda bakula ve samu na yinki beno ke kudia ve kintwadi na bawu. Samu, ya ke na Ngolo mosi mpe vision mosi na manima ya yawu, Ndinga ya Nzambi yina me monisama pwelele, samu na kukubika Dibuundu samu na Enlevement mpe kuvutuka na Yinzo. Yinga. “Mingi ke baka mbangu awa mpe kuna, mpe luzabu ke kuma mungi.” Ya kieleka.

¹¹¹ Ntangu yayi, yinki kele kima yankaka yina ke zabana? Beno tala bubu yayi, na mabuundu. Yawu yayi. Mu banza ti ya ke lwadisa ve, kasi mu fwana tuba yawu kaka. Na kutubaka . . .

¹¹² Na kilumbu yina mbeni ya Klisto ke basika.

¹¹³ Ntangu yayi, beno bambuka moyo, ntangu beto ke kuma na Bidimbu, mbeni yina ya Klisto ke landila kaka kumata na mpunda na kati ya Bidimbu. Daniel me tubila yawu awa, “Ntinu yina ke kwisa.” Ba ke katula Yandi, ba ke katula Yesu, samu na kusala mulemvo na bantu. Kasi, “Ntinu yina ke telama, kisafudi-kimwangisi,” yina vwandaka Rome, na nzila ya Titus. Mpe na ntangu yayi, ya ke ntinu yina me katuka na Rome, ke sala yawu. Mpe yandi ke monisama pwelele na kilumbu ya nsuka, beno kuwa ntangu yayi, “na kukibokilaka yandi mosi Nzambi,” mutindu Mpeve-Santu me kebisa beto na ba-Thessalonicien ya Zole, kapu 2.

Beto baka yawu, ba-Thessalonicien ya Zole, na yina beno ke kuzwa ndinga ya munu ve kasi Ndinga ya Nzambi. Ba-Thessalonicien ya Zole, kapu 2 mpe nzila ya 12. Beto tala. Ba-

Thessalonicien ya Zole, kapu 2 mpe nzila ya 12. Beto tala. Beto banda kuna na zulu, na nzila ya 7.

Ya kieleka mansweki ya disumu ya nkú ke na kusala dezia: . . .

(Yayi ke Paul ke na kutuba, na nzila ya Mpeve-Santu.) . . .

Kasi—kasi yandi ke monana na pwelele nionso, kaka ntangu muntu yina ke na kukanga yandi nzila ke pesa yandi kimpwanza ya kusala.

Nani kele “Yandi” awa? Muntu mosi me zaba yawu? Mpeve-Santu, “Muntu yina ke na kukanga yandi nzila.”

Na yina (ntangu) Muntu ya yimbi ke monana pwelele, . . .

Yinki ntangu? Kaka na ntangu Mpeve-Santu ke kwenda, yina ke na kukubama na kukwenda na ntangu yayi. Samu na yinki Yandi ke kwenda? Yandi ke nata Dibuundu na Yandi. “Ke monana pwelele!” Paul ke na kutuba, na nsi ya lutwadusu ya kimpeve.

. . . yina Mfumu ke kufwa na mupepe ya yandi ya yinwa, mpe bebisa yandi na ngolo ya nkwizulu ya yandi: (muntu ya yimbi, ya kieleka)

Muntu ya yimbi, ke kwisa na ngolo ya Satana mpe yandi ke sala konso mutindu ya bimangu ya luvunu mpe bidimbu ya ngitukulu ya luvunu,

“Beto ke dibuundu ya kulutila nene. Beto ke na *yayi*. Beto ke na *yayi*. Beno sala ngwisani beno nionso kintwadi,” beno me mona. “Beto kele ya kulutila nene.” Bimangu ya luvunu!

Mpe yandi ke sadila konso . . . ya yimbi samu na kuvuna bayina ke zimbana; samu ti bawu ndimaka ve mpe zolaka ve kieleka yina zolaka vuukisa bawu.

Na yina Nzambi ke na kufidisa bawu ngolo ya kuvunama, yina ke na kupesa bawu ngolo ya kukwikila na mambu ya luvunu:

Mpe na yina bawu . . . yina kwikilaka ve kieleka, kasi yangalalaka na kusadila yimbi ke kuzwa kitumbu.

¹¹⁴ Beno me bakula yawu? Oh, la la! Ntangu yayi, Paul ke na kutuba. Ntangu Kidimbu ya Nzambi ke talisama, Mpeve ya Yandi, Nkumbu ya Yandi, lemvo ya Yandi, mansweki yankaka yayi nionso yina ke na kulongama na ntangu yayi, Dibuundu ya Yandi ke na kukubama samu na kukwenda na Enlevement; kutiamuka ya Mpeve-Santu me sala yayi. Yawu yina Yandi me sala na bilumbu ya nsuka.

¹¹⁵ Ntangu yayi, beto tala. Beto ke na ntangu samu na yayi ya nsuka? [Dibuundu me tuba, “Amen.”—Mu.] Ya sambanu, “Kupakula ya kulutila Mazulu.” Oh, la la! Yawu yayi! Kima ya nsuka Yandi ke sala, kele yinki? Ntangu yayi, beto vutuka

kuna na Daniel, samu na kumona yina nionso Yandi ke sala awa. “Basabala makumi sambwadi.” Yinki ke salama na ntangu yayi? Mbote mingo.

*...ba me zenga samu na bantu ya nge mpe...
mbanza ya nge ya santu, samu na kusukisa bakukolama
(bakukolama ya bantu), ...samu na kusukisa disumu
(samu na bantu), mpe samu na kusungika disumu ya
bawu ya nkú, mpe samu na kunata kieleka ya mvula na
mvula (samu na ba-Juif), mpe samu na kutula kidimbu
na vision mpe profesi (tii na ntangu ya nsuka), mpe samu
na kupakula kisika ya kulutila Santu.*

Yawu yina balukanu sambanu ya nkzwizulu ya Yandi.

¹¹⁶ Ntangu yayi, “samu na kupakula kisika ya kulutila Santu.” Ntangu yayi, yayi mu ke tuba lendaka vwanda fioti ya ngitukulu na mwa ntangu fioti, samu na mingi ya beno kele milongi, kasi ntangu yayi beno vingila fioti kuna, beno tala kisika beto ke kuma.

¹¹⁷ Yayi kele kupakula, muntu mosi ve. Yesu me pakulamaka dezia. Ya kieleka? Buku ya ba-Actes me tuba ti Nzambi pakulaka Yesu na Mpeve-Santu; Yandi kwendaka bisika nionso na kusalaka mambote, na kubelusaka bambevo, mpe nionso yina. Yesu me pakulamaka, dezia. Yandi kele Mesiya. Mpe Mesiya zola kutuba “Yina me pakulama.” Ya kieleka? Kasi awa na ntangu ya nsuka, Yandi ke pakula kisika ya kulutila Santu.

¹¹⁸ Yinki kele “kisika ya kulutila Santu”? Na mutindu ya munu ya kutuba yawu, yina mu ke kwikila ti mu lendaka siamisa yawu na nzila ya Masonuku, kele kupakula “kisika ya kulutila Santu,” yina ke vwanda Tabernacle yina ba ke sadila na Millenium. Beno kuwa ntangu yayi, beno ke mona wapi mutindu mu me kuma kuna. Ba me zonzila yawu na Ezéchiel, kapu 4, . . . Ve, mu zola tuba kapu 43, nzila ya 1 mpe nzila ya 6. Beto vutuka kuna na Ezéchiel mpe beto tala mutindu ya ke tendula Millenium, wapi mutindu ba ke pakula . . . Ezéchiel 43, mpe beto tanga mwa fioti ntangu yayi mpe beno tala yina Yandi ke sala na Millenium yayi, kupakulama yayi. Na Ezéchiel 43, mbote mingo, mpe ntangu yayi beto banda na nzila ya 1, tii na nzila ya 6. Beno lenda tanga yawu nionso ntangu beno ke vutuka na yinzo, ya kieleka, beno yina ke na kusonika, Ezéchiel 43. “Na manima . . .”

¹¹⁹ Ntangu yayi, beno tala mbote, ntendulu ya Tempelo yina ba ke tunga na Millenium. Ntangu yayi, muntu nionso, mutangi nionso me zaba, ti kubanda Ezéchiel 40, tii kuna na kapu 44, ba ke tubila kaka Tempelo ya Millenium yina ba ke tunga na zulu ya ntoto, (muntu nionso me zaba yawu, beno me mona), ntangu nkembo ya Mfumu ke fuluka na kati ya yawu, mpe nionso yina. Ntangu yayi beto ke . . . tendula kaka Tempelo na kapu 43, mpe kubanda na nzila ya 1 tii na nzila ya 6.

Na manima yandi nataka munu na mwelo, na mwelo yina vwandaka kutala na ndambu ya este:

Mpe, tala, nkembo ya... Nzambi ya Israel kwisaka na lweka ya este: mpe ndinga vwandaka mutindu ndinga ya bamasa mingi: mpe ntoto vwandaka kusema na nkembo.

Mpe ya vwandaka landila mutindu vision yina mu monaka, landila mpe vision yina mu monaka ntangu mu kwisaka kubebisa mbanza: mpe vision vwandaka mutindu vision yina mu monaka pene ya nzadi Kebar; mpe mu kubwaka na kizizi ya munu.

Mpe nkembo ya MFUMU—nkembo ya MFUMU kotaka na yinzo na mwelo yina vwandaka na ndambu ya este.

Na yina mpeve zangulaka munu, mpe nataka munu na kivinga ya nganda; mpe, tala, nkembo ya MFUMU fulukaka na yinzo.

Mpe mu kuwaka yandi kutuba na munu kuna na yinzo; mpe bakala mosi vwandaka ya kutelema pene-pene ya munu.

¹²⁰ Kupakula, Kupakula Tempelo yina samu na kimfumu ya Millenium. Ntangu yayi na Levitique. Ntangu yayi beno tala mbote mutindu ba biekaka yawu na Levitique. Ntangu yayi, kana beto vutuka na Levitique, beto ke mona ti Moise kupakulaka tempelo. Beto vutuka fioti na ntangu beto ke kisika yango. Beto ke na ntangu mingi. Mpe beto vutuka na Levitique mpe beto ke mona ti na ntangu Moise pakulaka tempelo, na Levitique kapu 8.

¹²¹ Oh, mu ke zolaka kaka kufwanikisa Masonuku yayi na Masonuku yankaka. Beno ke zolaka yawu ve? Na yina beno—beno ke baka dibanza ya yina—ya yina beto ke na kusosa mpe yina beto ke na kusala. Ntangu yayi, beno nionso me zaba ti beto ke baka kaka Disonuku mosi awa mpe kuna, na zulu ya yawu.

¹²² Ntangu yayi, kapu 8 ya Lévitique, mpe mu me sonika yawu awa, nzila ya 10. Beno sonika Lévitique 8:10. Beto tala.

Mpe Moise bakaka mafuta ya kinganga-Nzambi, mpe yandi mwangisilaka yawu mafuta ya kinganga-Nzambi, mpe yandi pakulaka tabernacle mpe bima yina vwandaka na kati, mpe yandi santisaka yawu.

Mpe...yandi mwangisaka mafuta mbala sambwadi na zulu ya autel, ...mpe yandi pakulaka autel mpe bima ya yawu nionso, na zulu ya kusukudila masa mpe kima ya kutudila yawu, samu...samu na kusantisa yawu.

Mpe yandi mwangisaka...mafuta ya kinganga-Nzambi na zulu ya yintu ya Aaron, mpe yandi pakulaka yandi, samu na kusantisa yandi.

¹²³ Moise, na kati ya ntoto ya kuyuma, santisaka, to pakulaka tabernacle ya bisambu, samu na bana ya Israel ntangu ba vwandaka na nzietolo ya bawu. Ya pakulamaka.

¹²⁴ Ntangu yayi, na ba-Chroniques ya Zole, beno baka yawu, mpe beto ke mona mbiekolo ntangu Mpeve-Santu bakaka kisika ya Yandi na tabernacle, mpe beno tala mbote yina salamaka kuna. Na ba-Chroniques ya Zole kapu 5, mpe beto banda na nzila ya 13. Ba-Chroniques ya Zole kapu 5, mpe beto banda na nzila ya 13.

Mpe ya salamaka ti, ntangu bampungi mpe bantu yina vwandaka yimba vwandaka na ngwisani mosi samu na kukumisa mpe kutonda MFUMU; mpe ntangu ba bulaka musiki na mpungi na basembale mpe bisadilu yankaka ya musiki, na kukumisaka MFUMU, mpe na kuyimbilaka, Samu yandi kele mbote; mpe mawa ya yandi ke zingaka mvula na mvula: na ntangu yina yinzo fulukaka na dituti, yinzo ya MFUMU;

Na mutindu ti banganga-Nzambi telamaka... banganga-Nzambi lendaka sala kisalu ve samu na dituti: samu nkembo ya MFUMU fulukaka na yinzo ya Nzambi.

¹²⁵ Nzambi kotaka na kati ya kivinga ya longo yina fwanaka kupakulama, mpe yina ba pesaka Yandi samu bantu kukwisa sambilia. Na yawu, samu na kupakula, ya kele ve “kisika ya nge ya santu,” kasi samu na kupakula “kisika ya kulutila Santu.” Mpe beno simba, ti, Jérusalem ya Malu-malu kele “kisika ya kulutila Santu.” Mpe kupakulama ke vwanda na zulu ya Jérusalem ya Malu-malu yina katukaka na Zulu na sika ya Nzambi, yawu vwandaka ya kukubama mutindu kento yina me bongisa nzutu samu na bakala ya yandi. Kupakulama ke vwanda na zulu ya bawu.

¹²⁶ Ntangu yayi, ntangu Zorobabel biekaka tempelo ya yandi, na ntangu ba tungaka yawu diaka, ba pakulaka yawu diaka ve, samu ba pakulaka yawu dezia; ba bēbisaka yawu, mpe ba yidikaka yawu diaka. Kubeba kwisaka na zulu ya yawu. Ba yidikaka yawu mpe ba telemisaka yawu, na yina ba pakulaka yawu diaka ve. Ntangu ba me pakula yawu, ya vwandaka kaka ya kupakulama, mpe ya ke kaka ya kupakulama tii na ntangu yayi. Kasi ntangu Nzambi ke tula Tabernacle ya Millenium, Yandi ke pakula kisika ya kulutila Santu; “kisika ya nge ya santu” ve, kasi “kisika ya kulutila Santu.”

¹²⁷ Kasi ntangu Ntinu ke baka Kiti ya Yandi ya kimfumu samu na bamvula funda mosi, (Nkembo!) ya ke vwanda yimeni samu na yandi na ntangu yina. Kupakula kisika ya kulutila Santu ke vwanda kima ya nsuka yina ke salama. Ntangu ba me tunga Tabernacle; mvumbukulu ke salama; ba-Juif me vutuka; Klisto na Kento ya Yandi ya makwela me kwisa; ba-Juif, nkama na

makumi yiya na yiya ya mafunda me baka kidimbu; Millenium ke salama. Ya ke vwanda na kupakulama na ntangu kisika ya kulutila Santu ke pakulama; kisika ya santu, kisika ya Santu mingi, mpe kisika ya kulutila Santu. Na yina, kisika yayi ya kulutila Santu kele kivinga ya santu sika wapi Nzambi vwandaka zinga, na kati ya ba-Chérubin. Mpe, ntangu yayi, Klisto ke vwanda na kisika ya kulutila Santu, na kupakulama na zulu ya Yandi. Mpe kuna ya ke vwanda na mfunu ya mwini ve, samu Mwana-dimeme na kati-kati ya Mbanza ke vwanda Nsemo. Mwini ke lala ata fioti ve na Mbanza yina, mutindu kiboba ya Noko Jim vwandaka tuba. Mpe ya lala ata fioti ve, samu Klisto ke vwanda Nsemo yina, Yina me pakulama. Mpe Ntinu ke kwisa mpe ke baka Kiti ya Yandi ya kimfumu samu na bamvula funda mosi, samu na kuyala.

¹²⁸ Jérémie 3:12-18, kintwadi, beto tanga yawu. Kuna na Jérémie kapu 18, mu banza. Yinga. Ve, kapu 12, beno lemvokila munu, kapu 12 ya Jérémie, mpe beto banda na... Jérémie kapu 3, beno lemvokila munu. Jérémie kapu 3, mu me—me sonika yawu awa, kisika wapi, ntangu mu vwandaka longuka yawu, Mpeve-Santu vwandaka twadisa munu kaka na kisika mosi na yankaka, mu sonikaka yawu na mutindu mu lendaka. Jérémie kapu 3, na manima 12 tii na 18, mpe. Beto tanga yawu.

Yandi tubaka na munu na kukwenda na ndambu ya Nord na kutuba na Israel ti, Nge Israel, kento ya mubulu, kwisa vutuka, MFUMU me tuba; mpe munu ke na nganzi ya nge ve samu munu—munu... samu nganzi ya munu kububa na zulu ya nge ve: samu munu kele mawa mingi, me tuba MFUMU, yawu yina munu ke wila nge makasi ve.

Ndima kaka disumu ya nge ya nkú, ti nge salaka yimbi na ntwala ya MFUMU Nzambi ya nge, ndima ti na nsi ya konso yinsi nge salaka pite na banzambi ya nzenza,...

Yawu yina bawu salaka, kubanda na este, na weste, na bayinsi nionso. Beno me mona?

... mpe lemfukaka na ndinga ve, ndinga ya munu ve, MFUMU me tuba.

“Beno vutuka!” Beno ke kuwa yayi.

Beno vutuka, O beno bana ya mubulu, me tuba MFUMU; samu mu me (k-w-e-l-a-n-a)... Mu me kwelana na beno:...

“Meso ya bawu vwandaka ya kufwa, samu Mu me pesa Bantu ya makanda siansi. Kasi, beno vutuka, samu Mu me kwelana na beno.”

... mpe mu ke baka muntu mosi na konso mbanza, mpe zole na dibuta mosi,...

Ya kele ve bayina ke kukibokilaka bawu mosi ba-Juif ke kota. Kasi kimvuka yina me soolamaka ke kota, Benjamin ya

fioti yina kwisaka kuna na ntawala ya Joseph, kimvuka yina ba me baka na bayinsi nionso, mosi na mbanza mosi, mpe mosi na dibuta mosi.

...mpe Mu ke nata nge na Sion:

Mpe Mu ke pesa nge pasteur mosi landila ntima ya nge, yina ke kudisa beno na luzabu mpe lubakusu.

Mpe ya ke salama ti, ntangu beno ke fuluka mpe kuma mingi na ntoto, na bilumbu yina, me tuba MFUMU, ba ke tuba diaka ve, Sanduku ya ngwisani ya MFUMU: ba ke vwanda na mfunu ya yawu ve: to ba ke banza yawu diaka ve; to ba—ba ke tala yawu diaka ve; to ba ke sala yankaka diaka ve.

Mpe na ntangu yina ba ke bokila Jérusalem kiti ya kimfumu ya MFUMU; (mutindu Yandi ke vwanda kuna, beno me mona), mpe yinsi ya muvimba ke vukana (alleluia) na yawu, mpe nkumbu ya MFUMU, na Jérusalem: ba ke landaka diaka ve luzolo ya ntima ya bawu ya mubulu mpe ya yimbi.

¹²⁹ Yina na ntangu ba ke pakula Mbanza yina. Yina ke ntangu ba ke pakula Jérusalem ya Malu-malu. Mpe bayinsi nionso ya Mbanza . . . Kuna na Apocalypse kapu 22, ya me tuba ti mielo ke kangama ve na mpimpa, samu mpimpa ke vwanda kuna ve. Mpe bantinu nionso ya ntoto ke nata lukumu ya bawu mpe nkembo na Mbanza yayi. Bibaka ya yawu ke vwanda ya jaspe mpe ya sardoine, mitindu ya matadi kumi na zole; mpe mielo kumi na zole ke vwanda ya palata mosi, mosi na konso mwelo. Ya ke vwanda na mfunu ya mwinda ve kuna. Ya ke vwanda diaka ve na nsemo ya mwini, samu Mwana-dimeme yina kele na kati-kati ya Mbanza ke vwanda Nsemo. Mpe Yandi ke twadisa bantu ya Yandi na Luzingu ya kukonda nsuka. Ya ke vwanda na bayinti zole kuna, mosi na simu na konso simu ya nzadi, mpe ya ke vwanda samu na kubeluka ya yinsi. Yandi yina Mosi yina me pakulama ke kwisa, Mbanza ya Santu yina katukaka na Zulu na sika ya Nzambi, ke kulumuka na ntoto.

¹³⁰ Beto baka ntangu yayi yina ke salama na ntangu yina. Oh, beno zola yawu? Beto baka Esaïe 65, na mwa ntangu fioti. Ya ke kaka mbote mingi na kuluta na zulu ya yawu. Ya ke kaka mbote mingi na kubika yawu. Ya ke monana ti mwini kele ngolo fioti, kasi beto landila kaka na kukwenda.

¹³¹ Esaïe 65, beno kuwa yina ke salama na ntangu yina. Mpe beno kukiyufula kaka, nkundi ya munu ya nsumuki, kana beno—kana beno lendaka kondwa yayi. Esaïe 65, beto banda kuna na nzila ya 17. Beno kuwa mbote, beno nionso, ntangu yayi. Yayi ke na ntangu ya Millenium, ntangu kisika ya kulutila Santu me pakulama.

*Na yina, ntangu yayi, mu ke sala mazulu ya malu-malu
mpe . . . ntoto ya malu-malu: mambu ya ntama bantu ke*

yindula yawu diaka ve, to ya ke kwisa diaka na mabanza ve.

Kasi beno rwanda na kiese mpe beno sepela ntangu nionso samu na mambu yina mu ke sala: na yina, ntangu yayi, munu ke sala Jérusalem... Mu ke sala Jérusalem, (yayi ke Jérusalem ya Malu-malu), samu na kiese, mpe bantu ya yandi samu na kiese.

Yinki kele kupakulama? Kiese ya Mfumu.

...kusala Jérusalem samu na kiese, mpe bantu na nge samu na kiese. Mpe mu ke sepela na Jérusalem,...

Ntinu na Kiti ya kimfumu, na zulu ya ngolo ya kimfumu ya Kiti ya kimfumu, Kiti ya kimfumu ya Kukonda nsuka, mpe bantu ya Kukonda nsuka na kiese ya Kukonda nsuka na Mbanza ya Kukonda nsuka! Oh, la la!

Mpe mu ke sepela na Jérusalem, mpe kiese na kati ya bantu ya munu: mpe kudila ke rwanda diaka ve na kati ya yandi, to milolo ya mawa ke rwanda diaka ve.

Ya ke rwanda diaka ve na mwana, to kiboba ya bakala yina ke lungisa ve bamvula ya yandi: samu mwana yina ke kufwa na bamvula nkama mosi ke rwanda ntwenia; kasi nsumuki yina ke kufwa na bamvula nkama mosi ke kuzwa nsingulu.

Mpe ba ke tunga bayinzo, mpe ba ke zinga na kati ya yawu;...ba ke kuna bilanga ya vinu, mpe ba ke kudia mbuma ya yawu.

Ba ke tunga bayinzo ve, mpe samu muntu yankaka kuzinga na kati ya yawu; (ya zola tuba, beno ke kufwa mpe mwana ya beno ya bakala ke baka kisika ya beno) ...tunga, mpe muntu yankaka ke zinga na kati ya yawu; ba ke kuna ve samu muntu yankaka kudia yawu: samu bilumbu ya bantu ya munu ke rwanda mutindu bilumbu ya bayinti, mpe baponami ya munu ke sepela na bisalu ya maboko ya bawu.

Ba ke sala kisalu na mpamba ve, ba ke buta bana ve samu bawu kufwa; samu ba ke sala dikanda ya MFUMU, mpe bana ya bawu ke rwanda na bawu.

Mpe ya ke salama ti,...na ntwala ba bokila, mu ke pesa mvutu;...(Kupakulama yayi ya nkembo, na manima ya ba-Chérubin!) ...Mu ke pesa mvutu; mpe na ntwala bawu kumanisa na kutuba, mu ke kuwa.

Yingo na Mwana-dimeme ke kudia kintwadi,...yingo ke kudia matiti mutindu ngombe: mbombi ke rwanda madia ya nioka. Mpe ba ke sala yimbi ve to ba ke bebisve na mongo ya munu nionso, me tuba MFUMU. (Beno lenda kondwa yawu? Ve!)

¹³² Beno baka fioti na ntwala kuna diaka, mpe Esaie ke na kutuba diaka, na kapu 11, kubanda nzila ya 1 tii na 9. Beno kuwa yina yandi ke na kutuba awa diaka, ntangu yandi me kuzwa vision, na manima kumona bakento, mutindu ba ke sala na bilumbu ya nsuka. Yi-... Mbote, Esaie 11, na nzila ya 1.

Mpe dindalala ke basika na ntulu ya Isai, ... Divala yina ke basika na bansimbulu ya yandi: (Nani ya vwandaka? Klisto.)...ke basika na bansimbulu ya yandi:

Mpe mpeve ya Mfumu ke pema na zulu ya yandi, mpeve ya ndwenga, ya lubakusu, mpeve ya ndongisila...ya ngolo, mpeve ya luzabu mpe...mpeve ya kuvwanda na boma ya MFUMU;

Mpe yandi ke kupema kati ya kuvwanda na boma ya MFUMU: mpe yandi ke sambisa ve mambu mutindu meso ya yandi ke mona, to... landila bituba-tuba ya yandi ke kuwa na makutu:

Kasi yandi ke sambisa bampatu na kieleka, mpe yandi ke nganinaka disumu ya bawu ya nkú na zulu ya bantu ya yimbi ya ntoto: mpe yandi ke bula ntoto na ndinga ya yandi mutindu fimbu, mpe na mupepe ya bikobo ya yandi yandi ke kufwa muntu ya yimbi.

Yandi ke lwataka masonga, mpe kieleka mutindu mukaba na luketo ya yandi.

Mpe bibulu ke zinga kintwadi na mwana-dimeme, mpe yingo ke lala kintwadi na mwana-nkombo (ya ke nkombo); mpe mwana-ngombe na mwana-nkosi ke zingaka kisika mosi...to mwana-ngombe, to mwana-nkosi ke zingaka kisika mosi; mpe mwana ya fioti ke nataka bawu.

...Bangombe mpe bampakasa ke kudia kisika mosi;...bana ya bawu (mpe) ke lala kisika mosi: mpe bankosi ke kudia matiti mutindu bangombe.

Mpe mwana ya fioti ke sakana pene-pene ya nioka ya nganzi, mpe yandi ke tula diboko ya yandi na dibulu ya yawu.

Ata kima ya mpasi to ya yimbi ke vwandaka ve na miongo ya munu nionso ya santu: ntoto ke fuluka na luzabu...mutindu masa ke fulukaka na nzadi.

Hum! Ya ke na Jérusalem ya Malu-malu. Yina ya “malu-malu.” *Divala*, awa, yina ya me tubila, kele *Divala* ya David. “Yandi kele *Divala* mpe Dikanda.”

¹³³ Ntangu yayi, na manima ya yayi, Kento ya makwela ke monana. Na manima ya basabala makumi sambwadi, Kento ya makwela ke monana na Apocalypse kapu 19, nzila ya 1 mpe nzila ya 16. Yandi ke kwisa na Bakala ya Yandi ya makwela, Ntinu ya

ngolo. Oh, la la! Mu zaba ve kana beto ke mona nionso to ve. Beto me kuma kaka . . .

Mbote, beto tanga kaka kitini ya yayi, na mutindu nionso. Awa ke kisika Kento ya makwela ke kwisa, na manima ya yayi. Beno me mona? Ntangu Millenium ke banda, na yina Klisto ke kwisa vutuka na Kento ya makwela. Mbote, kubanda na 1 tii na 16, mpe na kapu 19.

Mpe na manima ya bima yayi . . .

Na manima ya Mpasi yayi ya nene; na manima ya Bakiadi; na manima ya Bidimbu; na manima ya Bampasi; na manina ya kulosa Satana; na manima Millenium me banda. Beno tala mbote!

. . . na manima ya mambu yayi mu kuwaka . . . ndinga ya nkonga ya nene na mazulu, yina bokaka na ngolo nionso, Alleluia; Mpulusu, mpe nkembo, . . . lukumu, . . . ngolo, kele na Mfumu Nzambi ya beto:

Balusambusu ya yandi kele kieleka mpe ya kudedama: samu yandi me sambisa kento ya kindumba ya nene, yina vwandaka vuna bantu nionso ya ntoto na bundumba ya yandi, mpe me pesa yandi kitumbu samu na bisadi ya yandi yina yandi kufwaka.

Mpe diaka yandi . . . bawu . . . Mpe bawu tubaka diaka, Alleluia. Mpe mulinga ya mbanza ya nene yina ba me yoka ke na kunanguka mpe yawu ke vwanda seko.

Yina ke dibuundi ya ntama ya kindumba, “mulinga ya yandi kunangukaka.”

Mpe bakuluntu makumi zole na yiya mpe baniamya yiya fukamaka mpe sambilaka Nzambi yina me vwanda na kiti ya kimfumu, bawu tubaka, Amen; Alleluia.

Na yina ndinga wakanaka sika vwandaka kiti ya kimfumu, mpe tubaka, Beno kembisa Nzambi ya beto—Beno kembisa Nzambi ya beto, beno nionso yina kele bisadi ya yandi, mpe ke zitisaka yandi, ata beno vwanda bakuluntu to bana ya fioti.

Na manima mu kuwaka ndinga ya nkonga ya nene, . . .

Beno kuwa! Yawu yayi, Dibuundi. Na manima Yandi mataka na kapu 3, awa Yandi yayi me kwisa. Beno me mona? Mpe ntangu yayi nzila ya 6.

Na manima mu kuwaka ndinga ya nkonga ya nene yina wakanaka mutindu makelele ya bimpo ya masa ya mubu, mpe ya bidumu ya ngolo, tubaka, Alleluia: Mfumu Nzambi ya beto ya ngolo nionso ke talisa kimfumu ya yandi.

Alleluia! Beno tala mbote! Makwela ya Mwana-dimeme me kwisa ntangu yayi. Yandi yayi me kwisa.

Beto yangalala mpe beto vwanda na kiese, mpe beto pesa yandi lukumu: samu ti makwela ya Mwana-dimeme me lunga, mpe kento ya yandi me kubama. (Yandi yayi me kwisa, bawu zole, Kento ya makwela na Bakala ya makwela.)

Mpe ba me pesa yandi kinkuti ya kitoko ya lino, yina ke na kusema mpe kele ya kuvedila: kinkuti ya lino kele... bisalu ya kudedema ya basantu.

Mpe yandi tubaka na munu, Sonika mambu yayi, Kiese na bayina ba me bokila na kubaka kisika na mukembo ya makwela ya Mwana-dimeme. Na manima yandi tubaka diaka, Yayi kele mambu ya kieleka yina yandi mosi Nzambi me tuba.

Na yina mu zolaka fukama na ntwala ya yandi samu na kusambila yandi. Mpe yandi zabisaka munu, Kusala mutindu yina ve: Mu kele kisadi mutindu nge mpe mutindu bampangi ya nge yina kele ya kukwikama na kimbangi ya Yesu: sambila Nzambi: ya kieleka kimbangi (ya Klisto) ya Yesu kele mpeve ya profesi.

Na yina mu talaka zulu ya kuzibuka, mpe... mpunda ya mpembe basikaka; ... (oh, la la!)... mpe nkumbu ya muntu yina yulukaka yawu kele Kwikama mpe Kieleka, mpe... yandi ke sambisaka mpe ke nwanaka na kieleka.

Mpe meso ya yandi vwandaka sema mutindu tiya, mpe... yintu ya yandi vwandaka na bayimpu mingi;

Ba lwatisaka Yandi yimpu ya yinki? “Ntinu ya bantinu.”

... mpe nkumbu mosi vwandaka ya kusonama na yandi, mpe ata muntu mosi ve zabaka yawu, kasi... yandi mosi kaka.

Mpe yandi lwataka lele ya mpembe ya kupola na menga: mpe nkumbu ya yawu kele Ndinga ya Nzambi.

“Na mbandukulu vwandaka Ndinga, mpe Ndinga vwandaka Nzambi. Mpe Ndinga kumaka muntu mpe zingaka na katì ya beto.” Ya vwandaka Nani? Yesu.

... mpe nkumbu ya yandi kele Ndinga ya Nzambi.

Mpe bankonga ya makesa ya mazulu vwandaka na manima ya yandi na zulu ya bampunda ya mpembe, mpe lwataka bilele ya lino, ya mpembe mpe ya kuvedila. (Nkembo! Yandi yayi me kwisa.)

Na yinwa ya yandi basikaka mbele ya yinda ya meno, yina... yandi ke bula bantu: mpe... yandi ke twadisa bantu nionso na yinti ya kisengo na diboko: mpe ke kamuna bambuma ya vinu na kima ya kukamuna bambuma yina kele samu na nganzi ya kulutila ya Nzambi ya Ngolo nionso.

*Mpe na zulu ya lele ya yandi mpe na zulu ya
mupende ya yandi nkumbu ya mutindu yayi vwandaka
ya kusonama, NTINU YA NTINU, MPE MFUMU YA
MFUMU.*

¹³⁴ Yinki ya vwandaka? Bantu ya Yandi lwatisaka Yandi yimpu Ntinu ya ntinu, mpe Mfumu ya bamfumu. Yandi vwandaka vutuka na Tempelo ya Yandi ya Santu, yina ba me pakula na Ntwala ya Nzambi, samu na kuzinga mpe kuyala na Millenium na Dibuundu ya Yandi. Amen! Yandi ke monisama, na Ntinu ya ngolo, samu na kubaka kisika ya Yandi na Iweka ya Yandi, Tempelo ya malu-malu ya kimfumu ya kupakulama.

¹³⁵ Ntangu yayi balukanu sambanu ya Apocalypse 6:1 tii na Apocalypse 19:21 me lungisama.

¹³⁶ Beno kuwa ntangu yayi, samu na kumanisa. Bidimbu Sambwadi, Bampungi Sambwadi, Bambungu Sambwadi, Bakiadi Tatu, kento na kati ya mwini, diabulu, to dalango ya mbwaki yina ba me losa, nionso yina ke salama na ntangu yayi ya Mpasi ya nene. Beno zimbana yawu ve. Bima yayi nionso ke salama na ntangu yayi.

Kasi yawu yayi balukanu sambanu ya Nkwizulu ya Yandi. Beno ke kwikila yawu? Yinki bantangu yayi ya nkembo ke vingila bayina ke zolaka Mfumu! Mu ke tuba na beno, bankundi ya munu, beto kondwa yawu ve. Beno kondwa yawu ve na mutindu nionso. Beno vwanda kieleka na kivuvu!

¹³⁷ Ntangu yayi, na Lumingu ke kwisa, kana Mfumu kuzola, mu zola kulonga, kana Yandi ke sadisa munu, samu na kutilisa kieleka kisika mosi na mosi ya bilumbu sambwadi yina, kisika ya me salama, na kulongaka kima ya mutindu—mutindu mosi na yina ya bubu yayi, mpe kutula bantangu yayi sambwadi, basabala sambwadi, basabala makumi sambwadi na kisika ya kieleka ya kivinga ya santu ya ba-Juif, mpe kutilisa kieleka kisika beto ke na kuzinga awa na nsuka, kana Mfumu kuzola.

¹³⁸ Beno zola Yandi? [Dibuundu me tuba, “Amen.”—Mu.] Beno lenda ndima kukondwa Zulu? [“Ve.”] Beto me kuma na nsuka ya ntangu!

Yinki Yandi ke kwisa kusala? Kima ya ntete ke salama, na ntwala Yesu kukwisa na ntoto, yinki ke vwanda kima ya ntete? Dibuundu ke vwanda (yinki?) na enlevement! Yesu ke kwisa na ntoto mpe ke kwenda tambula na ntoni, mpe ke pesa mbote na papa na mama, kusolula na beto nionso awa, mpe kumata? Ve!

Wapi mutindu ya ke vwanda? . . . Beto ke tuba na beno mutindu yayi, na nzila—na nzila ya Ndinga ya Mfumu, “Bayina na kati ya beto ke vwanda ya moyo mpe ke bikala . . .” Ba-Théssalonicien, kapu 5, “Bayina na kati ya beto ke vwanda ya moyo mpe ke bikana tii na Nkwizulu ya Mfumu, ke vwanda ve na mantwala to ke pekisa bayina kufwaka. Samu mpungi ya Nzambi ke bula; bayina kufwaka kati na Klisto ke vumbuka

ntete na lufwa: mpe beto yina ke vwanda moyo na ntangu yina mpe ke bikala Nzambi ke katula beto na ntoto mpe ke nata beto na kati ya matuti kintwadi na bawu samu na kukutana na Mfumu na mazulu.” Beto ke mata na ntangu mosi, na mbwetolo ya disu. Na ntangu yina, yina ke sukisa Bansungi ya Dibuundu.

¹³⁹ Na manima, awa na zulu ya ntoto Nzambi ke banda na kusala na ba-Juif. Ya ke vwanda na ba-profete zole. Kapu 11, beto ke kuma kuna. Ba-profete zole me pakulama, mutindu Elie na Moise, mu banza ti ya kele bawu. Mpe ba ke nata bansingulu ya nene, na manima ya kumona ti ba me vukana, mpe Rome me zenga ngwisani ya yandi, ntinu yayi.

Na kati-kati ya sabala yayi ya makumi sambwadi, ya ke zenga ngwisani ya yandi na Rome, to Rome ke zenga ngwisani ya yandi na Israel, mpe ya ke sala ti busafu kupanzana bisika nionso. Mpe ya ke vwanda na kufuluka ya nene, ntangu Bantu ya makanda yina ke bikala, mwense yina lalaka... Dalango, Rome, me losa masa na yinwa ya yandi, samu na kunwanisa bayina bikalaka na dikanda ya kento bayina ke tumamaka na misiku ya Nzambi. Rome ke sala yawu.

¹⁴⁰ Kimvuka ya nene ya mabuundu ke vukana kintwadi, mpe ke kotisa ba-Juif na kimvuka yayi ya nene, ke vutula bawu na tempelo ya bawu mosi samu na kusambilila diaka, na MUTINDU ME TUBA MFUMU ya Biblia, mpe ba ke vwanda na dibusu ya bawu mosi.

¹⁴¹ Ntangu yayi yinki bawu kele? Mu me simba yawu ntangu yayi. Ya ke ya malu-malu. Ba ke ntangu yayi yinsi mosi, yina ba me ndima. Ya kieleka? Kasi ba kele ntete ve na tempelo ya bawu samu na kusambilila. Mpe ntangu ba ke banda kusambilila na tempelo, Dibuundu ke vwanda me kwenda. Nzambi ke sala na ba-Juif mutindu yinsi mosi. Na yina ntangu ba ke kota na kimvuka yayi ya nene, Rome ke zenga ngwisani na kati-kati ya mvula makumi sambwadi, bamvula tatu na ndambu, yandi ke zenga ngwisani na bawu, mpe ya ke sala ti busafu yina ke pesaka kiadi kupanzana tii na nsuka. Na yina ba-Protestant, na ba-Juif, yandi ke talisa bawu zole mpasi. Na ntangu yina, ba-profete yayi zole ke telama mpe ke singa ntoto, ti mvula ke noka ve na bilumbu ya profesi ya bawu. Mpe ba ke kulumusa Tiya katuka na Zulu, mpe bima yankaka nionso. Beno vingila kaka. Beto kele na bima mingi awa, yina beto me bumba, samu na kulonguka.

¹⁴² Oh, wapi mutindu Yandi kele Nzambi ya nene! Yinki Tata yayi ya mawa! Bankundi ya munu, beno bika mu tuba yayi, mutindu pasteur ya beno. Ba ke bakula ve bantangu ya mbote beno me kuzwa. Beno ke bakula yawu ve. Ya ke na bantu mingi ya nene, ya ke na basantu mingi, ya ke na mafunda ya basantu yina kufwaka na bamvula me luta, bantu ya kufuluka na mpeve yina zolaka mona kilumbu yayi beno ke na kuzinga. Bika ti beno na munu kuzwa ndandu ya yawu.

¹⁴³ Yinki diaka beto fwana tala? Yinki beno lenda sala na manima ya yayi? Wapi sika beto ke kwenda? Yinki ke salama? Beto fwana kwenda kisika mosi. Beno fwana vwanda awa na ntangu nionso ve. Beno lenda zenga matiti ya beno; na sabala ke kwisa ya ke lomba ti beno zenga yawu diaka; yinga, mbala zole, na ntwala ya ntangu yina. Beno lenda sansa bana ya beno. Beno ke pesa bawu madia ya midi; na madia ya nkokila ba ke vwanda diaka na nzala. Beno pesa bawu madia ya nkokila; ba ke vwanda diaka na nzala na suka. Beno ke sumbila bawu basapatu; kana bawu kele mutindu bana ya munu, pene ya bangonda zole to tatu beno sumbila bawu diaka yankaka. Beno ke sumbila bawu bilele na ngonda yayi; na ngonda mosi to zole beno ke sumbila bawu bilele ya malu-malu. Beno me mona? Kima mosi ve ke vwanda ntangu ya yinda. Kima mosi ve ke vwanda ya kusama. Kima mosi ve ke simba ngwi.

Kulula ve bimvwama ya mpamba ya yinza
yayi,
Yina ke bebaka na nswalu nionso,
Tunga kivuvu ya nge na zulu ya bima ya
Kukonda nsuka,
Ya ke luta ata fioti ve!

Ntangu me fuluka na nsobolo ya nswalu,
Kima mosi ve na zulu ya ntoto ke simba ngwi,
Tunga kivuvu ya nge na zulu ya bima ya
Kukonda nsuka,
Simba diboko ya Nzambi ya moyo!

Simba diboko ya Nzambi ya moyo!
Simba diboko ya Nzambi ya moyo!
Tunga kivuvu ya nge na zulu ya bima ya
Kukonda nsuka,
Simba diboko ya Nzambi ya moyo!

Beno kuwa:

Na nsuka ya nzietolo ya beto, (Yandi ke zabisa
beto ntangu ya ke suka.)
Kana beto vwandaka ya kwikama na Nzambi,
Yinzo ya beto ya kitoko kuna na Nkembo,
(Mbanza yayi ba me pakula.)
Moyo ya beto ya kufuluka na kiese ke mona!

Simba diboko ya Nzambi ya moyo!
Simba diboko ya Nzambi ya moyo!
Tunga kivuvu ya nge na zulu ya bima ya
Kukonda nsuka,
Simba diboko ya Nzambi ya moyo!

Kulula ve bimvwama ya mpamba ya yinza
yayi,
Yina ke bebaka na nswalu nionso,

Tunga kivuvu ya nge na zulu ya bima ya
 Kukonda nsuka,
 Yina ke luta ata fioti ve!
 Simba diboko ya Nzambi ya moyo!
 Simba diboko ya Nzambi ya moyo!
 Tunga kivuvu ya nge na zulu ya bima ya
 Kukonda nsuka,
 Simba diboko ya Nzambi ya moyo!

Na yina beto kulumusa bayintu ya beto, kana beno me simbaka ntete ve Diboko ya Yandi, beno zola kwisa sala yawu ve na ntangu yayi?

Simba diboko ya Nzambi ya moyo!
 Tunga kivuvu ya nge na zulu ya bima ya
 Kukonda nsuka,
 Simba diboko ya Nzambi ya moyo!

¹⁴⁴ Mwana-kento ya ntwenia, nge ke kitoko na ntangu yayi. Mwa bansuki ya nge kele kitoko, mwa matama ya nge kele rose. Kasi, nge zaba, ya ke kaka mbasi, ti, ya ke beba. Nani kuzaba kana na sabala ke kwisa mwa bankusu ke kudia ve, na kati ya ntoto, mwa matama yina, ya kitoko, ya rose?

¹⁴⁵ Mpangi-bakala ya ntwenia, nge kele ngolo, nene, na misisa ya ngolo; nge ke na balukanu ya nene. Kasi na manima ya mwa ntangu fioti, mbasi kaka, bansuki yina ya kitoko ya kulingama, ke banda na kubwa, mpe yina nge ke bikana na yawu ke banda na kukuma mpembe. Mapeka ya nge ya nene, ya kusungama ke banda na kuniefwama, mpe bankusu ke banda na kudia maboko ya nge mpe misuni ya nge. Ba ke nangula nge samu na kutula nge, na kati ya ntoto.

Na yina, tunga kivuvu ya nge na zulu ya bima
 ya Kukonda nsuka,
 Yina ke luta ata fioti ve!
 Simba diboko ya Nzambi ya moyo!
 Simba diboko ya Nzambi...

Mu zola ti beno telama mpe beno simba diboko ya Yandi ntangu yayi.

Tunga kivuvu ya nge na zulu ya bima ya
 Kukonda nsuka,
 Simba diboko ya Nzambi ya moyo!
 Na yina na nsuka ya nzietolo ya beto, (Ya ke
 vwanda, kilumbu mosi.)
 Kana beno vwandaka ya kwikama na Nzambi,
 Yinzo ya beno kuna na Nkembo,
 Moyo ya beto ya kufuluka na kiese ke mona!
 Na yina beno kwenda simba diboko ya Nzambi
 ya moyo!
 Simba diboko ya Nzambi ya moyo!

Tunga kivuvu ya nge na zulu ya bima ya
 Kukonda nsuka,
 Simba diboko ya Nzambi ya moyo!

¹⁴⁶ Mu me mona bima mingi, bamvula pene ya makumi tatu na mosi zola kulunga yina mu ke na manima ya chaire yayi. Mu me mona bima ya mawa; mu me mona bima ya nkembo. Bima ya kulutila mawa yina mu me monaka ntete ve na luzingu ya munu... Na yina mu me monaka bana yina vwandaka kufwa na nzala na bala-bala; mu me monaka bamama yina vwandaka kulomba kitini ya dimpa. Kima ya kulutila mawa mu me monaka, kele kumona bakala mosi, muntu mosi, mpe yina lendaka vwanda mwana ya Nzambi, ke na kufwa kukondwa kuzaba Nzambi.

¹⁴⁷ Mu ke bambuka moyo ya kento mosi vwandaka ya kutelama na kielo, ya yinzo-Nzambi, na nkokila mosi, yina vwandaka seka munu. Mpe yandi tubaka, “Mu lendaka bika ve ngombe ya munu ya kento kuvwanda na nsambulu ya mutindu yayi yandi ke na yawu!” Na nsi ya ngunga mosi, ba bokilaka munu na lupitalu. Kento mosi ya kitoko, pene ya bamvula makumi zole na zole, yandi vwandaka boka, “Beno nata mulongi yina awa!” Yandi vwandaka mundimi ya Catholique, na lukwikilu.

Ntangu mu kwendaka kuna, mpangi-kento mosi ya kiboba tubaka, “Nge me kwisa na nsukinina mingi, Mpangi Branham. Yandi me kufwa pene ya minutu tanu me luta.”

Mu tubaka, “Mu lenda mona yandi?”

Yandi tubaka, “Yandi vwandaka bokila nge, na bandinga ya yandi ya nsuka, ‘Beno nata mulongi yina, Mpangi Branham!’”

Bakala ya yandi vwandaka kuna, yandi vwandaka boka, “Sambilala samu na yandi! Sambilala samu na yandi!”

Mu tubaka, “Ntangu me luta mingi ntangu yayi.”

¹⁴⁸ Mu bendaka bulanketi. Yandi vwandaka na meso ya nene ya ntinta ya café. Kento mosi ya kitoko; na mwa matona na kizizi ya yandi; yandi vwandaka na bansuki ya mbwaki ya ntinta ya café; yandi vwandaka kitoko mingi. Yandi belaka mingi na mutindu ti matona vwandaka basisa na kizizi ya yandi mutindu babuto. Meso ya yandi vwandaka na meso ya kubasika na nganda, mutindu yayi. Mpe, na yina, misopo mpe ba-rein ya yandi salaka, yawu yina—yawu yina... Ya ke salaminaka bantu mingi ntangu ba ke na kufwa, bantu mingi. Mpe yandi vwandaka ya kulala kuna, mutindu yina, yinwa yandi vwandaka ya kuzibuka. Mpe mikanda ya meso ya yandi awa, vwandaka ya kufika na kitini ya disu ya yandi ya ntinta ya café. Mu ke zimbana yawu ata fioti ve. Nkunga yina kwisaka na mabanza ya munu.

Kulula ve bimvwama ya mpamba ya yinza
 yayi. (Kitoko, nsemo.)

¹⁴⁹ Mu telamaka na lweka ya muntu mosi kuna na Port Fulton, yina vwandaka kufwa. Ba bokilaka munu na lweka ya mbeto ya yandi. Mpe mu sambilaka na yandi awa na autel na nkokila mosi. Yandi tulaka diboko ya yandi pene ya kento mosi. Mu tubaka, “Katula diboko ya nge na zulu ya mama yina.”

Yandi tubaka, “Mu ke na kutwadisa yandi na Nzambi.”

¹⁵⁰ Mu tubaka, “Katula diboko ya nge pene ya yandi.” Mu ke kwikilaka ve na mambu ya mutindu yina. Yandi dasukilaka munu. Yandi basikaka na kubulaka dikulu.

Mu kwendaka mona yandi, na manima ya mwa ntangu fioti, ntangu yandi vwandaka kufwa. Yandi talaka munu na kizizi, yandi tubaka, “Kusambilala samu na munu ve, Mpangi Bill. Mu me zimbana. Mu me kwenda.” Yandi tubaka, “Nionso yina mu salaka tii na kisika yayi, mu me zimbisa yawu.”

¹⁵¹ Kilumbu mosi, mu telemaka kuna na nsongi, pene-pene na kisika yayi awa, pene ya bakala mosi yina bokilaka munu na lweka ya mbeto ya yandi ntangu yandi vwandaka kufwa. Yandi tubaka, “Mu vwandaka zola ntangu nionso kusala kima *kingandi*, mpe kima *kingandi*.” Yandi tubaka, “Kasi mu me sadilaka Mfumu ata fioti ve. Bantangu mingi mu vwandaka zola ve kukwenda na autel.” Yandi tubaka, “Mpangi Branham, sambilala ti Nzambi kupesa muswa ti mwana ya munu ya kento ya fioti kuyidika bima yina mu zolaka sala. Mbala yankaka yandi lendaka sala kima mosi samu na Mfumu.”

¹⁵² Mu tubaba, “Ya lenda salama ve, mpangi-bakala. Bima yina nge zolaka sala me zimbana.” Hum!

¹⁵³ Mu telemaka pene-pene ya bakala mosi, mu me monaka yandi ke nwanisa bampeve ya yimbi na bangunga makumi zole na yiya. Yandi tubaka ti bampeve ya yimbi vwandaka ya kutelama na lweka ya mbeto ya yandi na miniololo na nkingu. Yandi tubaka, “Beno bika ve ti bawu kukanga munu!” Yandi vwandaka boka; yandi lombaka kukanga yandi samu yandi vwanda na mbeto. Yandi vwandaka tuba, “Yandi yina. Beno ke mona yandi ve? Ya me kwisa kubaka munu.” Yandi mangaka Nzambi, kubanda ntama mingi. Yandi vwandaka na bibumbulu ya nene ya kufuluka na matiti ya bitwisi, ya kufuluka na blé, bampunda ya kitoko ya kutesila mbangu. Mvula mosi na ntwala ya yina, yandi singaka Nzambi na kizizi ya Yandi; yandi bulaka kento ya yandi mbata samu yandi vwandaka kwenda na tabernacle. Beno zaba yinki salamaka? Nzasi bulaka na kibumbulu ya yandi, mpe yawu kufwaka bampunda ya yandi, yokaka matiti ya yandi ya bitwisi. Mpe bakala yango kufwaka na nsingulu mosi na zulu ya yandi, na kunwanaka samu na kukatula bampeve ya yimbi pene-pene ya yandi.

¹⁵⁴ Mpe nkundi ya munu mosi ya kiboba (nkembo!) kuna, yandi kumaka na nsuka ya nzila. Mu tubaka, “Nge ke kwenda, tata?”

Yandi tubaka, “Ntangu me lunga, Billy.”

Mu tubaka, “Wapi muutindu ya kele?”

¹⁵⁵ Yandi tubaka, “Nionso kele mbote.” Yandi tubaka, “Nata bana ya munu pene-pene ya mbeto ya munu.” Yandi tulaka maboko ya yandi ya ntama ya kulemba na zulu ya bana ya yandi nionso mpe yandi sakumunaka bawu. Yandi tubaka na bana ya yandi zole, yandi tubaka, “Beno telemisa maboko ya munu na zulu, mutindu Josué na Caleb salaka.” Beto vwandaka kukiyufula yina yandi ke tuba. Yandi tubaka:

Kilumbu ya kiese, kilumbu ya kiese,
Kubanda Yesu me sukulaka masumu ya munu!
Yandi longaka munu na kutala mpe kusambila,
Mpe kuzinga konso kilumbu na kiese.

Beto fwana kuma na mwa bima yina, bankundi ya munu! Muntu nyonso ke zolaka kudia madia ya mbote, kuvwanda na tomabilu ya kitoko, kuvwanda na bima ya kulutila kitoko beto lendaka vwanda na yawu. Mu ke nganina beno ve. Nionso yina kele mbote mingo. Nzambi zola ti beno vwanda na yawu, kasi:

Kulula ve bimvwama ya yinza,
Yina ke bebaka na nswalu nionso,
Tunga kivuvu ya nge na zulu ya bima ya
Kukonda nsuka,
Yina ke luta ata fioti ve!

Beto telemisa maboko ya beto ntangu yayi na yina beto ke yimbila.

Simba diboko ya Nzambi ya moyo!
Simba diboko ya Nzambi ya moyo!
Tunga kivuvu ya nge na zulu ya bima ya
Kukonda nsuka,
Simba diboko ya Nzambi ya moyo!

¹⁵⁶ Ntangu yayi beto telama, beto baluka mpe beto pesa mbote na muntu mosi. Beto ke landila, lukutakanu, na mwa ntangu fioti. Kasi mu zola ti beno baluka na ntangu beto ke yimbila nzila yina yankaka ya nkunga ya yina.

Simba diboko ya Nzambi ya moyo!

Sala yawu, tata! Sala yawu, papa! Na Nzambi! Sala, yawu ntwenia! Sala yawu, mpangi-bakala! Sala yawu, mpangi-bakala!

Tunga kivuvu ya nge na zulu ya bima ya
Kukonda nsuka,
Simba diboko ya Nzambi ya moyo!

¹⁵⁷ Beno ke na kiese ve samu na Yandi? Beno tuba “Amen!” [Dibuundu me tuba, “Amen!”—Mu.] Beno nionso yina zola Yandi, beno tuba, “Lukumu na Mfumu.” [“Lukumu na Mfumu!”] Beno nionso yina ke kwikila ti beno ke kwenda na Mbanza yina ya karé, beno telemisa diboko ya beno. (Beno vingila, na mwa ntangu fioti, na nkunga ya beno.)

Mu kele mosi ya Mbanza yina ya kitoko, (Wapi mutindu ntangu yayi?)
 Yina Mfumu me yidika samu na bantu ya Yandi
 Mosi;
 Kisika bantu yina nionso ba me kuula na
 bansungi nionso
 Ke yimbila “Nkembo!” pene-pene ya Kiti ya
 kimfumu ya Mpembe;
 Bantangu yankaka mu ke zola kwenda na
 Zulu,
 Mpe mu ke mona nkembo kuna:
 Yinki kiese ya ke vwanda, Ntangu mu ke mona
 Mvulusi ya munu,
 Na Mbanza yina ya kitoko ya wolo.

Beno ke zolaka yawu ve?

Mu kele mosi ya Mbanza yina ya kitoko,
 Yina Mfumu ya munu me yidika samu na bantu
 ya Yandi;
 Kisika bantu nionso yina ba me kuula na
 bansungi nionso
 Ke yimbila “Nkembo” pene-pene ya Kiti ya
 kimfumu ya Mpembe;
 Oh, ntangu yankaka mu zola kwenda na Zulu,
 Mpe mu ke mona kiese kuna:
 Yinki kiese ya ke vwanda, Ntangu mu ke mona
 Mvulusi ya munu
 Na Mbanza yina ya kitoko ya wolo.

Beno zola Yandi? [Dibuundu me tuba, “Amen.”—Mu.] Na:
 yina beno baka Nkumbu ya Yesu na beno,
 Nge mwana ya mawa mpe ya kiadi;
 Yawu ke pesaka nsayi,
 Bisika nionso Yawu ke kwenda.

Nkumbu ya Ntalu (Nkumbu ya Ntalu!) O
 Nkumbu ya kitoko! (O Nkumbu ya kitoko!)
 Kivuvu ya ntoto mpe nsayi ya Mazulu;
 Nkumbu ya Ntalu (Nkumbu ya Ntalu!) O
 Nkumbu ya kitoko!
 Kivuvu ya ntoto mpe kyesey ya Mazulu.

Ntangu yayi, beno zimbana ve Lumingu ke kwisa na suka, na
 ngunga ya yivwa na minuti makumi tatu. Na yina beto ke meka,
 kana Mfumu kuzola, na kumanisa na ntangu ya mbote, samu
 na kusambila samu na bambevo, Lumingu ke kwisa na suka na
 ngunga ya yivwa na minuti makumi tatu.

Beto ke fukimina Nkumbu ya Yesu,
 Beto ke fukama na makulu ya Yandi,

Samu na kubyadisa Yandi ntinu ya bantinu na
Mazulu,
Ntangu nzietolo ya beto ke suka.

Nkumbu ya Ntalu, (Nkumbu ya Ntalu!) O
Nkumbu ya kitoko! (O Nkumbu ya kitoko!)
Kivuvu ya ntoto mpe nsayi ya Mazulu;
Nkumbu ya Ntalu, (Nkumbu ya Ntalu!), O
Nkumbu ya kitoko!
Kivuvu ya ntoto mpe kye se ya Mazulu.

Beno kuwa kaka mbote nzila yayi:

Beto ke fukimina Nkumbu ya Yesu,
Mutindu Kinwaninu ya ngolo;
Ntangu bakumekama ke kwisila nge,
Niunguta Nkumbu yina ya Santu na kisambu.
(Ya ke ya kulunga!)

Nkumbu ya Ntalu, (Nkumbu ya Ntalu!) O
Nkumbu kitoko! (Oh Nkumbu ya kitoko!)
Kivuvu ya ntoto mpe nsayi ya Mazulu;
Nkumbu ya Ntalu, (Nkumbu ya Ntalu), O
Nkumbu ya kitoko!
Kivuvu ya ntoto mpe kye se ya Mazulu.

Ntangu yayi mu ke vutula lukutakanu na pasteur, Mpangi
Neville, samu na kutuba bampova ya nsuka mpe nionso yina
yandi lendaka kutuba. 

61-0730E Balukanu Sambanu Ya
Nkwizulu Ya Gabriel Na Daniel
Branham Tabernacle
Jeffersonville, Indiana U.S.A.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org